

Yëkkuö tsá kit Pablo tö Corinto wakpa a 1 Corintios

Mik Pablo bak kanëblök Éfeso etá ie' tö yëkkuö i' kit Jesús mik erblökwakpa serke Corinto e'pa a. Pablo kèwö ska' tá Corinto dör Grecia ká bua'ie. Pè' bak senuk ikì dōkà 650.000. E'pa shuà 400.000 klöulewà kanëblök é. Pablo wák tö tsawe Corinto wakpa a Jesús tté buaë paka'. E' tté tso' kitule Hechos 18.1-17 e' kì.

Alaköl eköl kiè Cloe e' yami wele de Pablo pakök ie' tso' Éfeso eë. E' tö ie' a iyè' tö Jesús mik erblökwakpa tso' Corinto e'pa ñippöke tajë ena welepa tso' íyi sulusi wamblök tajë, e' kuekì ie' tö yëkkuö i' kit. Ñies ie' tö ikit ilè chaki' ie'pa tö ie' a e' iutoie ie'pa kimoie ena ipattoie.

Kam Corinto wakpa erblö Jesús mik etá ie'pa tö íyi tajë dalöieke Skököl skéie, e' dör kabene et. Ì dalöieke ie'pa tö e' a ie'pa tö iyiwak jcheke e' chkà katekerakitö iyamipa tá ì dalöiekerakitö e' dalöioie. E' cheke Pablo tö yëkkuö i' kì.

Ñies ì dalöieke ie'pa tö e' wé kos a alakölpa sulusi datse tá wëpa serkerak itá. Erë mik wëpa ñekkëpa erblë' Jesús mik etá ie'pa kë éna iane tö wes ie'pa ké senuk. E' kuekì Pablo tö ikkaché tö wes wëpa alaköl tá' ena alaköl kë tá' e'pa kawötá senuk.

Kíie tá pè' wele bak ñì dapa'uk Jesús mik erblökwakpa tá, e'pa tö ie'pa wöbla'weke kache tté wa. Ese ché Pablo tö yëkkuö i' kì.

Shke'wè

¹ Ye' dör Pablo. Skököl tö ye' klöo'bak iwák er wa Cristo Jesús ttekölpa tsá, e'pa ekölie. S'yami kié Sóstenes tso' ye' ta.

² A' dör Skököl icha erule serke Corinto, e'pa a sa' tso' yëkkuö i' shtök. A' batse'oule a' batsulewä Cristo Jesús mik e' wa. A' klöo' Skököl tö ie' icha batse'rpaie wépa kos tso' ká wa'ñe tö e' tsatké kié Sköképa Jesucristo a e'pa ta ñita. Jesucristo dör ie'pa ena se', e' Kököl.

³ Skököl dör S'yé ena Sköképa Jesucristo, as e'pa er buaë chö ena sene bërë mü a' a.

Pablo tö wéstela ché Skököl a

⁴ Skököl er buaë ché taië a' a Cristo Jesús batamik, e' kueki ye' tso' wéstela chök ie' a kekraë.

⁵ A' batsulewä Cristo mik, e' wa i kos kiane a' ki wakanewè Skököl a, e' mène a' a taië. Skököl tö ieri mé a' a iwà pakoie buaë, ñies iwà jchenowä buaë.

⁶ E' wa iwënewä a' shua tö moki a' tö Cristo tté klö'wé buaë.

⁷ Es i kos kiane a' ki kanebloie Skököl a, ese métke ie' tö a' a iWiköl wa. E' wakanewëke a' tö a' tso' Sköképa Jesucristo datskene e' panuk, e' dalewa.

⁸ Ñies ie' tö a' kimeräe buaë as a' e' tköwä darërëe ie' mik dö bata ekkë. Es a' kë ki i nuí ta' ie' wöa mik Sköképa Jesucristo datskene e' kèwö ska'.

⁹ Skököl ttö mokië e' tö a' klöo'bak as a' ser batsulewä ie' alà Jesucristo dör Sköképa e' mik.

Jesús mik erblökwakpa ñi blabatsélor

¹⁰ A yamipa, ye' tö a' a ichè Sköképa Jesucristo ttö wa tö a' kos erbikö ñikkëe. Kë a' ñi blabatsök. A'

senú buaë ñita. A' kabikeitsó ñikkëë wës wák eköl ã es.

¹¹ A yamipa, tayë kiè Cloe, e' yamipa welepa tö ibiyó ché ye' a tö a' tso' ñippök ttè kî. E' kuëkî ye' tso' a' a' ichök es.

¹² Ie'pa tö ye' a' iché tö a' kos ñippöke ñita i' es: A' welepa tö icheke: “Ye' dör Pablo klé.” Welepa skà tö icheke: “Ye' dör Apolo klé.” Iëkölpa tö icheke: “Ye' dör Cefas* klé.” A' skà tö icheke: “Ye' dör Cristo klé.”

¹³ ¿Ima a' ibikeitsè tö Cristo tso' blabutsule? Au, kë idör es. ¿Ye' kötewä krus mik a' skéie? Au. ¿A' wösune ye' ttö wa? Au.

¹⁴ Wëstela chekeyö Skëköl a' tö ye' kë wä a' wösune taië. Wëpa kiè Crispo ena Gayo, e'pa ã wösuk ye' tö.

¹⁵ Kë yi a' iyënuK tö ye' tö a' wösuk ye' ttö wa.

¹⁶ Ye' éna ianewä i' ta' tö ñies ye' tö wëm kiè Estéfanas e' wösuk ena ie' yamipa eKka. Kë ye' éna iane tö yi skà wösuk ye' tö.

¹⁷ Cristo kë wä ye' patkëne s'wösukuök, ie' tö ye' patké ie' tté buaë pakök. Ye' kë tö ttè e' paketa' ttè iskië wa wës s'yöule taië esepa kapakö es. Ye' tö ipakeke ttè wöshakla wa as Cristo kötewä krus mik e' tté diché kë chöwa.

Skëköl diché taië ena ie' siwé iskië, e' wà dör Cristo

¹⁸ Wëpa weirdaë aishkuö ta', esepa a' Cristo kötewä krus mik, e' tté dör alipa ttèie. Erë se' tsatkërke, esepa a' Skëköl diché taië, e' tté idir.

¹⁹ E' dör wës itso' kitule Skëköl yëkkuö kî es, e' tö ichè:

“Skëköl tö ichè: Wëpa wä siwä' jcher iskië,

* **1:12 Cefas:** E' ã kiè ñies Pedro.

ešepa meraat̄yö wēs kē wā ì jchēr es.

Wépa kabikeitsō tajē,

ešepa éna ká chōwērawayö.”†

Es Skököl yēkkuö tō ichè.

20 Es idir e' kueki s'ditsö wā siwā' jchēr iskiē, ¿wēs ešepa de? S'wōbla'uk ttè dalöiēno wa wakpa, ¿wēs ešepa de? Wépa a s'ditsö íyi ttè wà pakar ñì a buaē ¿wēs ešepa de? Skököl a t̄a siwā' iskiē jchēr s'ditsö wā, e' kē wā t̄a', e' dör wēs al̄ipa ttè es.

21 Ttè e' wā dör i' es: Skököl wā íyi jchēr iskiē, e' kueki ie' kē wā imeneat tō se' tsatkēr ì jchēr s'ditsö wā iskiē ese wa. E' skéie ie' tō ime'at tō wépa erblé Cristo mik itté pakarke e' wa, ešepa ē tsatkērdaē eré ittser al̄ipa ttèie.

22 Ì kē or yi a ese kiane suè judiowak k̄i ttè klö'woie. Griegowak tō siwā' iskiē ese yuleke tajē.

23 Eré Cristo kötēwā krus mik, e' ttè pakeke sa' tō. Ttè e' sulune judiowak yōki. Pē' kē dör judiowak, ešepa a t̄a e' dör al̄ipa ttè.

24 Eré wépa kōs klö'bak Skököl tō iwák a, judiowak ö pē' kē dör judiowak, ešepa a Cristo dör Skököl diché tajē ena ie' siwé iskiē e'.

25 Ì wé ie' tō e' wēr wēs ì wè al̄iwakpa tō es. Ñermata ie' wā siwā' jchēr iskiē tkōk̄a sulitane ts̄ata. Iwēr wēsua tō ie' kē diché t̄a', ñermata ie' diché t̄a' tajē tkōk̄a sulitane ts̄ata.

26 A yamipa, mik Skököl tō a' klö'bak, et̄a ¿wēs a' dör? E' anú a' éna. Ká i' wakpa a t̄a a' kibiiepa kē wā siwā' iskiē jchēr. A' kibiiepa kē ttō dalöiërta'. A' kibiiepa kē dör kēkēpa tajē ese ditséwö.

† 1:19 Isaías 29.14

27 Erë wépa cheke ká i' wakpa tō tō kē iwā ì jcher, esepa shukit Skëköl tō wōbla wa, wépa wā siwá' jcher iskië, esepa jaëwoie. Wépa kē dör kékëpa taië ká i' wakpa a, esepa shukit ie' tō wōbla wa, wépa dör kékëpa taië, esepa jaëwoie.

28 Wépa watëuletsa, wépa bikeitseke ká i' wakpa tō tō kē idör ìe bua', wépa kē dör ì, esepa shukit ie' tō, wépa dalöiërta' taië ká i' ki, esepa wōowaie diöshet.

29 Es kē yi a e' ttsënuuka Skëköl wörki.

30 Erë Skëköl wák tō a' bätswā Cristo Jesús mik. Cristo batamik ie' tō se' ké siwá' moki jchenukwā iskië. Nies Cristo batamik ie' tō se' klö'wé wës pë' buaë yësyësë es, ñies se' de ie' wák ichaie batse'r yënettsa sene sulu ulà a.

31 E' kueki s'kawōta senuk wës Skëköl yëkkuō tō ichè es, e' tō ichè: “Yi e' tsakka as ese e' ttsōka ì wé Skëköl tō ese wa.”‡

2

Cristo kōtewā wōtëulewā krus mik, e' tté paké Pablo tō

1 A yamipa, mik ye' dē' kewe Skëköl tté buaë pakök a' a, etā kē ye' wā iwā pakane siwá' iskië ese wa wës a' wakpa yöule taië esepa tō s'wōbla'weke es.

2 Mik ye' bak a' shūa, etā ye' kē ki ì bār tté kianeia. Ye' ibikeitsétke Jesucristo kōtewā wōtëulewā krus mik e' tté ë pakök.

3 Mik ye' dē' bitu a' ska', etā ye' tts'e'rke alabëbë kē diché ta' taië, ye' suarke taië painuke taië.

‡ 1:31 Jeremías 9.24

⁴ Ye' tō Skëköl tté buaë e' paké a' a, erë kë ye' wā ipakane siwā' iskië s'ditsö a ese wa a' dakiñoie. E' skéie ì pakéyö a' a, e' wā kkaché a' a Skëköl Wiköl tō idiché wa tō mokjē idir.

⁵ Skëköl tō iwé es as a' kë erblö siwā' iskië ese mik, e' skéie as a' erblö ie' diché mik.

Se' wā Skëköl siwé jcher iWiköl wa

⁶ Erë wépa tkëulewatke darërë Cristo mik, esepa je' éna iane tō tté pakeke sa' tō, e' dör siwā' iskië chökle. Erë e' kë dör s'ditsö ena iwökirpa siwā' ese; esepa diché erkewatke.

⁷ Siwā' pakeke sa' tō, e' dör Skëköl siwā' bak blëulewā s'ditsö yökj e'. Ká iaiaë kam ká i' yör, e' yökj ie' tō ibikeitsbak tō sene michoë olo tā' taië, e' meraëitö se' a ie' siwā' wa.

⁸ Siwā' e' kë ane s'ditsö wökirpa éna. Ie'pa éna ianúpa, e'ma ie'pa kë wā Skëképa Jesús olo tā' taië e' kötewā.

⁹ Erë e' dör wes itso' kitule Skëköl yëkkuö kj es, e' tō ichè:

“Ì buaë kë sūule yi wā,
ì buaë kë ttsëule yi wā,
ì buaë kë bikeitsule yi wā,

ese tso' Skëköl wā mè wépa éna ie' dalër esepa a.”*

¹⁰ Erë e' kos wā kkachéitö se' a iWiköl wa. Iwiköl tō iyi ulitane shuyulekettsā sekkā dō Skëköl erbikö iskië eseë.

¹¹ Se' wiköl tso' se' a, e' ë wā ijcher ì tso' se' er a. Es ñies Skëköl Wiköl ë wā ijcher ì tso' ie' er a.

¹² Ie' tō iWiköl mé se' a, e' kuekj kë se' kabikeitsöia wes s'ditsö kabikeitsö es. Ie' tō iWiköl

* **2:9** Isaías 64.4

mé se' a as ì buaë kōs méitō se' a er bua' wa e' wà ar se' éna.

¹³ E' kueki kē sa' tō s'wōbla'weku' ká i' a siwa' tso' ese wa. S'wōbla'weke sa' tō ttè kkaché Skëköl Wiköl tō sa' a e' wa. Es sa' tō Skëköl Wiköl íyi e' wà pakeke ttè méitō sa' a ese wa.

¹⁴ Wépa kē a Skëköl Wiköl ku', esepa a ie' íyi e' dör alipa íyi, e' kueki ie'pa kē ki ikiane. Nies ie'pa kē éna iwà ar; ttè e' wà arke se' éna Skëköl Wiköl ē wa e' kueki.

¹⁵ Erë wépa a Skëköl Wiköl tso', esepa éna ie' íyi ulitane wà armi buaë. Erë ì weke ie' tō ie'pa a e' kē wà anuk yi éna.

¹⁶ E' dör wes itso' kitule Skëköl yëkkuö ki es, e' tō ichè: “Skëköl erbikö e' kē jcher yi wà. Kē yi a ie' pautuk.”† Erë se' eltépa wà Cristo erbikè tso'.

3

Se' kōs dör Skëköl kanè mésopa

¹ A yamipa, mik ye' bak a' shua, etā ye' kē a kapakar a' tā wes s'wëttsëke Skëköl Wiköl tō esepa tā kapakè es. E' skéie ye' kawötā kapakök a' tā wes ye' kunúpa kapakök s'tso'ia s'wák dër sulu dikia ö ala'r tsitsirla kē yöule buaë Cristo ttè wa esepa tā kapakè es.

² Ttè wa ye' tō a' wōblaö' e' dör tottola wes tsu'diö mè ala'rla a es, kam a' a chkè darërè katar e' kueki. jErë ikkè tā kam a' a chkè darërèè katar,

³ a' serkeia wes s'wák dër sulu ki ikiane es e' kueki! A' ñippöke, a' ukyërke ñi ki tajë, e' wà kiane chè tō a' seriā wes s'wák dër sulu ki ikiane es, wes pè' kē a Wiköl Batse'r ku' es.

† 2:16 Isaías 40.13

4 A' welepa tö icheke: “ye' dör Pablo klé.” A' welepa skà tö icheke: “ye' dör Apolo klé.” A' ttökeia es, e' wa iwënewa tö a' dör wës pë' kē a Wiköl Batse'r ku' es.

5 Eta ichö ye' a tö ¿Apolo dör yi? ¿Pablo dör yi? Sa' dör Skököl kanè mésopa ě. Sa' tö Jesús tté buaë paka' a' a, e' batamik a' de erblök Jesús mik. Kanè me' ie' tö sa' böł a kuā'kī kuā'kī, e' wakanewé sa' tö.

6 Jesús tté buaë e' tsá tkéyö a' er a, wës íyi kuatké es. Apolo tö ikkö'né as italar, erë Skököl wák tö iwà tala'weke.

7 Yi tö íyi kuatkeke, ñies yi tö ikkö'neke, esepa kē dör ì. Skököl tö iwà tala'weke, e' dör ibua'ie.

8 Yi tö íyi kuatkeke, ñies yi tö ikkö'neke, esepa dör ñies ěme ie' a. Ie' tö iské meraë ie'pa a eköl eköl wës iwakanewekerakitö es.

9 A' dör wës ie' tē es, e' a sa' böł kanēblöke ie' a. Ñies a' dör wës u yörke ie' a es.

10-11 Ie' er buaë ché ye' a, e' wa ime'itö ye' a ichkí tkökwa wës u yuökwa bua'buā es. E' ukuökī tā u yuökwa pa skà de ikí yuökmi. U yörke Skököl a e' chkí tkënewatke e' dör eköl ě, e' dör Jesucristo. Kē yi a ichkí kuā'kī tkënuwane. E' kuēkī se' ulitane eköl eköl kawötā e' kkö'nuk buaë tö wës iwà kī yuekemisö.

12 Se' tö iwà yuèmi orochka wa, inukölchka wa ena ák bua'buā wa ö iwà yuèmisö kaltak wa, kākō wa ena kuaköl wa.

13 Mik Jesucristo datskene, eta iwërdaë tö is iwà yuésö. E' kēwö ska' tā se' kanè ma'ordaë bö' wa isuöie tö is idir.

14 U chkí tulunewa, e' kī se' tö iwà yué, e' tā e' kē ñanewa bö' a tā esepa a iské merdaë.

15 Erë ì yuésö e' ñanewā, e' tã kanè e' weirdawa. Erë esepa tsatkërdaë bö' yökì, erë kë ì atë ie'pa ulà a wës s'tkòshkar u ñarkewa yökì es.

16 ¿A' kë wā ijcher tō a' wákpa dör Skëköl wé, ie' Wiköl serke a' shuā e' kuekì?

17 Ie' wé dör batse'r, e' dör a' wákpa. E' kuekì e' olo'yéwā yi isie tō, e' tã ese olo'yerawā ie' tō.

18 Kë a' e' kitō'ukia. A' welepa e' bikeitsö tō a' wā siwā' iskië jcher wës s'ditsö tō ibikeitseke es, e' tã esepa kawõtã e' ökwa aliie as siwā' mokì jcherwā iwā.

19 Ì dör siwā' iskië s'ditsö a, ese dör alipa ttè Skëköl a. E' dör wës ie' yëkküö tō ichè es: “Wépa wā siwā' iskië jcher taië, esepa klö'werawā Skëköl tō iwákpa erbikö s'dakiñoie e' wa wës iyiwak klö'wëwasö sho' wa es.”

20 Ñies ichéitö i' es: “Skëköl wā ijcher buaë tō ì tso' ká i' a, ese siwé jchermi s'wā taië, e' kë dör ìe bua'.”

21-23 Erë a' dör Cristo icha ena Cristo dör Skëköl icha. E' wà kiane chè tō íyi ulitane mé Skëköl tō a' a a' kimoie. Ye' ena Apolo ena Pedro, e'pa tso' a' kimuk. E' kíie tã ì kos tköke i'ñe tã, ñies aishkuö tã, s'ser ena s'duöwā, ekkè kos tso' a' kimuk. E' kuekì kë a' kãne s'ditsö wele kkeökkã taië tō e' dör ibua'ie as s'mi' ikléie.

4

Jesucristo ttekölpa tsá, e'pa kanè

1 Sa' bikeitsö tō sa' dör Cristo kanè mésopa. Skëköl ttè bak blëulewā e' wà pakè wërke sa' wökì wës íyi kueblu es.

2 Íyi kuēblu kawōta iwakanéuk yēsēsē wēs iwōkir tō iuk patké es.

3 Es idir, e' kuēki ima a' tō ö yile skà tō is ye' kanēblōke Cristo a e' bikeitseke, e' kē ki ye' tkine. E' kīie ta ima ye' wák tō ye' kanē bikeitseke, e' kē ki ye' tkine.

4 Ye' er kē wā ye' kkatēne, erē kē e' wa yō ichēpa tō kē ì sulu ku' ye' ki. Skēkēpa Jesucristo tō ye' shuleraē, ima e' tō ye' bikeitseke, e' ē ki ye' tkirke.

5 Mik ie' dene etā sulitane shuleraēitō. Ì kōs tso' blēulewā se' er a, ñies ì dalērmik se' serke, ese kōs kkacheraēitō wōshak sulitane wōrkī. E' kēwō ska' ta se' kōs kanēblōke buaē ie' a, e'pa kīkerakā ie' tō. E' kuēki kē s'kkatar, kam s'shulir kēwō dōkā e' yōki.

6 A yamipa, ye' tō ye' wák ena Apolo ché a' a' a' kīmoie as e' wa a' tō iwà saū tō kē a' kàne ì tso' kitule Skēkōl yēkkuō kī chētkeyō ñe' dalōsēukwā. Kē a' kàne e' ttsōkā taiē sa' ekōl wa ena sa' ēkōl wōōkwa diōshēt.

7 ¿Wēs a' tō ichēmi tō a' dōr s'malepa tsata? Ì kōs tso' a' wā, ì buaē eri ta' a' wā, wēs a' kabikeitsō, e' kōs me' Skēkōl tō a' a. ¿Iōk a' e' ttsōkā taiē tō wēsua íyi kōs e' dē'bitū a' wákpa wā, a' wákpa er wa?

8 Wēsua a' ibikeitseke tō Skēkōl siwā' jcher taiē a' wā, e' dōr wē', kē ì kī kianeia a' ki. A' e' ttsō tō a' s'wēttsēmitke blu'paie, erē kam sa' dōkā ekkē. Mokī a' mú s'wēttsēmitke blu'paie, e'ma sa' detke a' ta ñita s'wēttsuk.

9 Erē ye' a ta, wēsua sa' dōr Jesús ttekōlpa tsá e'pa méat Skēkōl tō s'ditsō malepa bataie. Ye' ittse tō ká ulitane wakpa ñies Skēkōl biyōchōkwakpa ulitane e'pa tso' sa' weirke e' weblök. Sa' dōr wēs s'bolōkpa tō s'klō'wēwā tsēmi sulitane wōrkī ttēwā es.

10 Cristo tté kuęki sa' wër alije, erë a' e' bikeitsö tö a' wä siwa' iskië jcher buaë a' batsulewä Cristo mik e' kuęki. Iyërke tö sa' kě diché ta', erë a' diché ta' tajë. A' dalöierťa' tajë, erë sa' kě dalöierťa'.

11 Dö ikkë ta' sa' tekeia bli tö ersir tö; kě sa' datsi' ta' buaë; pë' tö sa' we'ikeke siarë; sa' wákpa kě wa u ta' senoie;

12 sa' kanablöke darërëë sa' wák ulà wa dö sa' shtrinewä da'ä ekkë. Mik pë' alibchöke sa' ki, etä e'pa ä sa' er buaë chöke. Mik ie'pa tö sa' we'ikeke, etä e' dalë'ttseke sa' tö er bua' wa.

13 Mik pë' tö sa' cheke suluë, etä e' iutekene sa' tö ttè bua' wa. Dö ikkë ta' ká i' wakpa wa sulu sa' wër. Ie'pa ä sa' dör wës ushña uyanettsä u'rki es.

14 Ye' kě wä ttè i' kite a' ä a' jaëwoie, ë ye' tso' a' pattök wës iyë éna ila'r dalër ese pattëitö es.

15 Cristo Jesús tté buaë paka' ye' tö a' ä kewe, e' wa a' bàtsewä ie' mik. E' kuęki moki ye' dör wës a' yë es. A' mú wä s'wöbla'ukwakpa Cristo tté wa tso' döka 10.000, erë ye' eköl ë dör wës a' yë es.

16 E' kuęki ye' tö a' pattè tö a' senú wës ye' serke es.

17 E' kuęki ye' tö Timoteo patkëmi a' ska'. Ie' dör wës ye' wák alà es Skëkëpa wa. Ie' dör ye' ttökata yësyësë dalër tajë ye' éna. Wës ye' dör Cristo Jesús mik erblökwak e' ser, e' ttè wa ye' tö ie' icha kos tso' erule erule ká wa'ne, e'pa wöbla'weke. Ttè e' ska' Timoteo tö a' er erane.

18 A' welepa e' ttséka tajë tö ibikeitseke tö ye' kě döpa a' ska'.

19 Erë Skëkëpa ki ikiane, e' ta' ye' mi'ke a' pakök bet. Mik ye' de etä ye' tö isueraë tö a' wépa e' ttséka tajë, esepa wä Skëköl diché ta' ö ie'pa kabërke ë.

20 Ì blúie Skéköl tso' e' wà wënewa idiché tajë e' kĭ, kě dör ttë ě wa.

21 ¿Ì kiane a' kĭ? ¿A' kĭ ikiane tö ye' dō kësik wa a' uñuk? Ö ¿a' kĭ ikiane tö ye' dō a' ska' er bua' wa, a' dalëritsé wa?

5

Sene sulu watōttsasö

1 Ye' itté ttsé tö a' shua wëm tso' eköl e' trërke suluë tkōka pë' kě tö Skéköl dalöie, esepa tsata. Ie' wa iyë alaköl tso'.

2 Ì sulu e' tköke a' shua, erë e' wa a' e' ttsökekaia tajë. E' skéie ¿wes e' kě wa a' jaëne? ¿Wes e' kě wa a' eriane? Warma wëm ñe' uya'ttsabak a' tö a' shua.

3-4 Erë ye' wák kě ku' a' ta, erë ye' ttöke wes ye' wák tso' a' ta es. Wëm ñe' shulétke ye' tö Skékëpa Jesús ttö wa wes ye' wák tso' a' ta es. Mik a' ñi dapa'uke etä eë ye' tso'ñak a' ta Wiköl Batse'r wa. Ñies Skékëpa Jesucristo diché tso' a' ta.

5 E' wösha ta wëm ñe' wömúttsa a' tö Satanás ulà a as iwák dër suluë e' wöklör ta iwák tsatkër mik Skékëpa datskene e' kéwö ska'.

6 A' e' ttsökä tajë sene sulu wa, e' kě dör buaë. ¿Kě a' wa ijcher tö pan wölöwoka elkela tö harinachka kos wölöwëka?

7 Sene sulu e' dör wes pan wölöwoka kéchke* es, e' tö a' sulu'wekewa. E' kueki ese kos uyōttsa a' shua. Es a' dōraë buaë yësyësë kě a' ì sulu ta'ia wes pan yöule kě a' iwölöwoka iëne es. Cristo kötëwa se' nuì skéie. Ie' dör wes obeja jcheke Judiowak

* **5:7 pan wölöwoka kéchke:** Judiowak wöblar pan wölöwoka tso' ie'pa u a e' kos uyōktsa Ie'pa Yëpa Yërulune Egipto e' kéwö tkö'weketke ie'pa tö e' yöki.

Yépa Yërulune Egipto, e' kέwö tkö'woie es. E' kuëki ñermata a' batse'oule Skéköl wöa Cristo batamik.

⁸ Es kë se' kàne Cristo kótewā se' skéie, e' kέwö tkö'uk pan yöule iwölöwoka wa ese wa. Itkö'üsö pan kë yöule iwölöwoka wa ese wa. E' wà kiane chè tò itkö'üsö këkraë sene moki yësyësë ese wa. Kë se' kàne itkö'uk sene sulu tò s'sulu'wekewā ese wa.

⁹ Yëkkuö iët patkë' ye' tò a' a, e' ki ye' iyè' tò a' kë kàne e' batsök trër wakpa ta.

¹⁰ Erë pè' kë tò Skéköl dalöie dör trër wakpa ö iyi kkechök taië ese wakpa ö akblökwakpa ö iyi diököl dalöiökwakpa, esepa kë chök ye' ku' a' a. Esepa chöpa ye' tò, e'ma a' kawöta duökwa as kë a' e' batsö esepa ta.

¹¹ Wépa yè' ye' tò a' a yëkkuö ki, esepa dör wépa e' chö tò ie'pa erblöke Jesús mik esepa. Erë ie'pa dör trënukwakpa ö iyi kkechök taië wakpa ö iyi diököl dalöiökwakpa ö s'chök suluë wakpa ö bloblopa ö akblökwakpa. Kë a' e' batsök esepa ta, ñies kë a' chkök esepa ta.

¹²⁻¹³ Wépa kë dör Skékëpa Jesús icha ¿wes esepa shulèmi ye' tò? Skéköl wák tò ie'pa shuleraë. Erë wépa dör Skékëpa icha ñi dapa'uke a' ta, esepa kawöta shulè a' tò. E' kuëki a' tò iú wes itso' kitule Skéköl yëkkuö ki es, e' tò ichè: “Yi tò ì sulu wamblé, e' uyöttsa a' shua.”

6

A' ñippöke e' shulö a' wákpa tö

¹ Mik a' wele tò ì sulu wamblé iyami eköl ki, eta ¿wes ese mi'ke ie' wā kkatè s'shulökwakpa kë tò Skéköl dalöie, esepa ska'? ¿Iök e' kë shulè a' wákpa dör batse'r e'pa tö?

² ¿A' kě wā ijcher tō se' batse'r, e'pa tō ká i' wakpa shuleraē aishkuō tā? E' dör es, e' tā ¿wes i'ñe tā íyi tsitsirla ese ě kě shulir a' a?

³ ¿A' kě wā ijcher tō ñies Skěköl biyöchökwakpa shuleraēsö? Ie'pa shuleraēsö, e' tā ¿wes a' kě a ñippè tso' ká i' kī ese shulir?

⁴ E' kuekī a' welepa ñippöke ñita, e' tā ¿wes ese mi'ke a' wā shulè pè' bānet ska'?

⁵ I' chéyö a' jaewoie. Yi a' a' shulirmi ¿ese kě ku' a' shua da'a?

⁶ Erē e' skéie a' mi'ke ñi kkatök s'shulökwakpa kě erblötā' Jesús mik esepa ska'.

⁷ A' ñi kkatöke s'shulökwakpa ska', e' ě wa iwēnewā tō sene sulu e' alékatke a' kī. Idalè'ttsök bërē ¿e' kě dör íbua'ie? ¿As itō se' íyi ekiblō!

⁸ Erē e' skéie a' wákpa tō ì sulu ñe' wambleke ñi tā dō s'yamipa erblöke Cristo mik esepa íyi ekibleke a' tō.

⁹ ¿A' kě wā ijcher tō wépa dör ì sulu wamblökwakpa, esepa kě dōpa ì blúie Skěköl tso' e' a? Kě a' e' kītó'uk. Wépa dör trēnukwakpa, wépa dör íyi diököl dalöiökwakpa, s'senewabak dalöseukwā wakpa, wépa trēr wépa tā, alakölpā trēr alakölpā tā, esepa kōs kě dōpa ì blúie Skěköl tso' e' a.

¹⁰ Ñies wépa dör akblökwakpa, wépa dör íyi kkechök tajē wakpa, bloblopa, s'chök suluē wakpa, esepa kōs kě dōpa ì blúie Skěköl tso' e' a.

¹¹ A' welepa bak senuk íyi ekkē wamblök, erē Skěköl tō a' paköa'bak, a' batseq'bak, a' klöq'bak wes pè' buaē yēsyesē es iWiköl wa Skěkēpa Jesu-cristo ttō wa.

Skěköl kě wā se' tsatkēne as se' tō ì sulu wamblöia

12 A' welepa tō icheke: “se' wā kawō tso', ì kos kiane wè se' kī, ese woie.” Erē ye' ichè tō kē ì ulitane dör buaë se' a wè. Ye' wā kawō ta' ì ulitane woie, erē kē ye' e' mupattsa as ilè e' alōka ye' kī.

13-14 A' welepa tō icheke: “chkè dör s'ñawi a, ñies s'ñawi dör chkè a.” E' yēne erē aishkuō ta' íyi böt ñe' ewerawa Skëköl tō. Erē s'chkà kē dör trënoie. Skëköl tō s'chkà shke'werakane aishkuō ta' idiché taië wa wes ie' tō Skëkëpa Jesús shke'okane es. E' kueki s'chkà kē meneat trënoie wes a' tō ibikeitseke es, imeneat ì buaë woie Skëkëpa a, ñies ie' tō s'chkà kkö'neke.

15 ¿A' kē wā ijcher tō se' batsulewā Cristo mik, e' kueki se' chkà dör etkë ie' chkà ta? E' dör es, e' ta' ¿wes se' tō s'chkà dör Cristo icha e' ia'wëmika senukka alaköl sulusi ta' ese wa? ¡Kë se' kàne e' ia'ukka yēs!

16 ¿A' kē wā ijcher tō mik yi sené alaköl sulusi ta, e' ta' ie'pa bōl mía wes wák eköl è es? E' dör wes itso' kitule Skëköl yëkkuō kī es. E' tō wëm ena ilaköl e' chë i' es: “Ie'pa bōl serdaë ñita ta' ie'pa mía wes wák eköl è es.”*

17 Erē yi batsulewā Skëkëpa Jesús mik, ese dör wes wák eköl è es ie' ta.

18 E' kueki a' tkōshkar trë yöki. Sene sulu skà kos, e' kē tō s'chkà dalösewëwā wes trë es. Mik se' trërke, etā s'chkà dör Cristo icha, e' méttasö o'ka kē dör Cristo icha, ese a. E' wa s'wák chkà dalösewëwasö.

19-20 ¿A' kē wā ijcher tō a' chkà dör Wiköl Batse'r e' wé? Skëköl tō iWiköl mé a' a, e' tso' a' a. Ie' tō a' to'ttsabak, e' ské dör darërëë. A' kē dör a' wákpa

* 6:16 Génesis 2.24

icha, a' dör ie' icha. E' kueki a' ké senuk yësyësë as ie' kikarka.

7

Se' serwa ñita e' pakè

¹ Ì chaki' a' tö ye' a yëkkuö ki, e' wà iuteke ye' tö i'ñe. A' tö ye' a ichaki' tö ÷buaë idör tö se' ké serwa alakölpa ta?

² Erë ye' ichè a' a tö tajë trë tso', e' yöki a' kos maso tsúwa eköl eköl.

³ A' wépa kos kawöta senuk ilaköl ta, es ñies a' alakölpa kos kawöta senuk iwëm ta.

⁴ Alaköl chkà ké meneat ie' wák ë a, e' meneat ñies iwëm a. Es ñies iwëm chkà ké meneat ie' wák ë a, e' meneat ñies ilaköl a.

⁵ Ie'pa ké kàne ichkà kkëuk ñi yöki. Erë ie'pa kawö mé ñi a e' batsöktsa ñi yöki ekuölö ë ttoie S'yé ta, e' ta e' ë dalewa ké ie'pa ñi köpawa. Mik ká e' tka, etä ie'pa ñi köwane dö' Satanás tö ie'pa erkiöwè trë nuk, ké ie'pa diché dë'ka e' kkö'nuk e' kueki.

⁶ Erë ye' ké ku' a' a ichök tö a' kawöta ñi batsöktsa ñi yöki es, a' ki ikiane, e' ta a' tö iwëmi es.

⁷ Ye' a ta sulitane mú dör wës ye' es, ké alaköl ta'. Erë Skököl tö imé sulitane a ku'a'ki ku'a'ki ñi kimoie.

⁸ A' wépa tso'ia ekörla ñies a' wépa dör schö, esepa a ye' ichè tö buaë idör tö ie'pa mú ser kekraë ekörla wës ye' es.

⁹ Erë ie'pa ké e' kkö'nuku' trë yöki, e' ta ie'pa mú maso yulöne senowaie. S'serwa e' dör bua'ie maso kkechekesö ñië e' tsata.

¹⁰ A' wépa senewabak, esepa a ye' tö ttè dalöiëno i' meke: a' ké kàne ñi ökwa. Ttè e' ké dör ye' ttè, e'

mé Skëképa Jesús tö se' a. Alakölpa kë kàne iwëm ökwa.

¹¹ Erë ie' tö iéwa, e' ta ie' kë kàne senukwa wëm o'ka ta, ie' kawöta senuk ekörla kë wëm ta'. Ie' kë senak es, e' ta ie' ké er bua'ukne iwëm ki. Nies wëpa alaköl ta', esepa kë kàne ilaköl ökwa.

¹²⁻¹⁴ A' malepa senewabak, erë e' maso kë erblöta' Jesús mik, esepa a ttè dalöiëno kë meneat Skëképa Jesús wa. Erë esepa a ye' ichè tö a' masopa kë arwa. Iwëm kë erblöta' Jesús mik, isalema e' tsatkërmi ilaköl olomik. Nies alaköl kë erblöta' Jesús mik, isalema e' tsatkërmi iwëm olomik. Ie'pa ñi éwa, e' ta ie'pa ala'r dör wes pë' kë erblöta' Jesús mik esepa ala'r es, ie'pa tsatkè e' dör darërë. Erë iyé ena imi serke ñita, kë ñi anewa, e' ta isalema ie'pa tsatkërmi iyé ö imi olomik. E' kueki ye' ichè tö a' maso senakia a' ta, e' ta kë iarwa.

¹⁵ Erë a' maso kë erblöta' Jesús mik, e' éna a' akwa krö wa, e' ta kë iwöklö'war a' kë klöulewa iulà a. Erë Skëköl tö se' klöo'bak senuk bërë ñita.

¹⁶ E' kueki ibua'ie dör tö a' sermiia bërë ñita. A wëm çì tö be' a ichök tö be' alaköl kë tsatkërpa be' olomik? A alaköl çì tö be' a ichök tö be' wëm kë tsatkërpa be' olomik?

¹⁷ E' dör wes ttè wa ye' tö Skëképa Jesús icha erule erule e'pa ulitane wöbla'weke ká wa'ñe es. Ye' tö ie'pa a ichè tö wes a' ku' Skëköl tö mik a' klöo'itö iwák a eta, es a' atú bër. Ie' tö ieri mé a' a seno eköl eköl es.

¹⁸ Wëpa tottola kkuölit tëule tsir, mik ie'pa klöo' Skëköl tö iwák a eta, esepa kë kàne e' mane'ukne wes. Es nies wëpa kë wakyöule es, mik Skëköl tö ie'pa klöo' eta, esepa kë kàne e' wakyöök.

19 Se' wakyöule ö kë se' wakyöule e' ska' Skëköl kë tkine yës. Ie' ttè dalöiëno, e' dalöiekesö, e' je' ki ie' tkirke.

20 A' kôs e' tsùat wës a' dör mik ie' tö a' klöo' iwák a eta es.

21 Mik ie' tö a' klöo', eta ¿a' klöulewā kanè mésoie? e' ta kë a' tkinuk e' ki. Erë a' a kawö tso'ia e' yöktsa e' ulà a, e' ta a' e' yöttsa.

22 Mik ie' tö a' klöo', eta a' klöulewā kanè mésoie, e' ta e' yë'ttsa ie' tö sene sulu ulà a kanebloie Skëkëpa Jesús a. Es ñies mik Skëköl tö a' klöo', eta a' kë dör kanè méso ñe'se, e' ta e' klöo' Cristo tö ie' wák kanè mésopaie. E' kuëki a' klöulewā kanè mésoie, e' ta kë a' tkinuk e' ki.

23 Skëköl tö a' to'ttsabak, e' kuëki kë a' e' tiukne yile skà ttè dikia.

24 A yamipa, wës a' ku' Skëköl tö mik a' klöo'itö eta, es a' atú bër. A' senú buaë yësyësë ie' a, sene me'itö a' a e' a.

25 Ima a' tö ye' chaki' yëkkuö ki wépa tso'ia ekörla, esepa ki, e' iuteke ye' tö i'ñe. Ese tté kë mène ye' a Skëkëpa Jesús wā. Erë ima ibikeitsèyö, e' chekeyö a' a. Skëköl ye' suë er siarë wa e' wa ieri méitö ye' a iwà jchenowā buaë. E' kuëki i' chekeyö e' mik a' erblömi.

26 I'ñe ta se' serke kawö darërë a, e' kuëki ye' a ta buaë idir tö se' kôs e' tsùat wës s'tso' es.

27 Wëm senewābak, ese kë tö ilaköl ökwa. Wëm duria ekörla, ese tayë kë yular.

28 Erë wëm senéwā, e' ta buaë idir. E' wa ie' kë wā i' sulu wamblëne. Ñies alaköl kam serwā, ese senéwā, e' ta e' dör buaë. E' wa ie' kë wā i' sulu wamblëne. Erë wépa senewābak, esepa we'ikëmi ká i' ki s'weirke ese tö tköka wépa kë senewābak

ešepa tsata. E' yöki ye' éna a' tsatkak, e' ě kueki ye' ichè tò buaë idir tò a' ser ekörla.

29-31 A yamipa, ye' ichè tò kě se' a kawö ta'ia tajë. Wēs ká i' dör i'ñe ta e' erkewatke. E' kueki i'ñe ta ena kēkraë kě se' kàne senukia er me'rie i' tso' ká i' ki ese ki. Se' senewabak, ešepa kě er mukwa e' ki. Se' iuke siarë, ešepa kě er mukwa e' ki. Nies se' ttsë'rke buaë, ešepa kě er mukwa e' ki. Se' tò i' tuè ta', ešepa kě er mukwa i' tso'rak iwa ese ki. Se' serke buaë i' tso' ká i' ki ese mik, ešepa kě er mukwa ese ki.

32 Ye' ki ikiane tò a' mú ttsë'r buaë, kě tkir i' ki. Wēpa serke ekörla, ešepa wa kawö tso' kibiie Skëköl iyi sauk ena i' wër buaë ie' wa ese uk.

33 Erë wēpa senewabak, ešepa kawöta i' tso' ká i' ki ese sauk as iwër buaë itayë wa.

34 Es ie'pa ki iyi böt kané tso'. Es nies alakölpa dör schö ena busipa wēm kě ta', ešepa wa kawö tso' kibiie Skëköl iyi sauk. Ie'pa e' mumittsa senuk batse'r. Erë alakölpa senewabak, ešepa kawöta i' tso' ká i' ki ese sauk as iwër buaë iwēm wa.

35 Ttè ekkë chéyö a' kimoie, kě dör a' wöklö'woie. Ye' ki ikiane tò a' ser buaë yësyësë Skëköl ě a, kě wötkeku' i' tò.

36 Wēpa ttè meuletke tayë a senukwa, ešepa wele tò ibikeitsè: “Tayë duéswö detke senowa, nies ye' kě a seneia ekörla. Bua' idir ye' a senukwa ie' ta”, e' ta ešepa a ye' ichè tò a' senakwa, e' ta a' senúwa, e' kě dör suluë. A' senúwa.

37 Erë wēpa ttè meuletke tayë a senukwa, erë ešepa kě éna senakwaia, e' ta ešepa a ye' ichè tò e' dör buaë tò a' kě serwa. Erë a' kawöta ibikeitsökwa bua'iewa kewe tò a' wákpa er wa a' kě senakwa.

Ñies a' kawōtā isauk buaë tō kē yi ku' a' a ichök tō kē a' senukwā. A' tō ibikeitsétke tō a' senak ekōrla kekraë, e' tã bua' idir tō a' kē serwā.

³⁸ Es ye' tō ichè tō wépa senéwā, esepa tō iwé buaë. Erè wépa kē sene'wā, esepa tō iwé bua'ie.

³⁹ Alaköl senewābak, e' kawōtā senuk iwēm ě tã dō mik iwēm blēnewā etā. Iwēm blēnewā e' tã ie' serwamine wēm o'ka tã. Erè ie' kawōtā senukwā wēm erblé Skëkëpa mik ese ě tã.

⁴⁰ Erè ye' ichè tō bua' idir ie' a tō ie' mú ser ekōrla, kē senewāne. E' tō ie' ttsë'weraë buaë shutë. Ye' tō iklö'wé tō ye' a Skëköl Wiköl tso' ñies, e' kuëki ye' tō a' a ichè es.

8

Iyiwak jchëule íyi diököl tso' dalöiè ese a, e' pakë

¹ Chkè meule íyi diököl tso' dalöiè ese a, ese ki a' tō ye' a ichaki' yëkkuö ki, e' iutekeyö j'ñe.

Ima a' tō íyi diököl ñe'se ché, e' dör moki e' jcher se' wā. Erè kē a' éna ichökwa tō se' wā íyi jcher, e' tō se' kèmi e' ttsökka taië s'malepa ki. Erè s'malepa dalëritsekësö, e' tō ie'pa diché ki ieraë.

² Yi e' bikeitsö tō ie' wā íyi jchertke taië, e' wa iwēnewā tō kam ie' wā ijcher wes ikawōtā jchenuk es.

³ Erè yi tō Skëköl dalëritseke, ese mik ie' bätse buaë.

⁴ Chkè meule íyi diököl tso' dalöiè ese a ese katèsö, e' ki a' tō ye' a ichaki'. Se' wā ijcher buaë tō íyi diököl ñe'se wák kē tã', e' kuëki kē idör ìie bua'. Skëköl chökle, e' dör eköl ě.

⁵ Pè' kě tò Skèköl dalöiè, esepa tò iklö'wé tò ì dalöiekerakitö, esepa tso' taiè sërke ká jai a ò ká i' a. Esepa kiérakitö kèköl ö skèkèpa. Moki esepa tso',

⁶ erè Skèköl dalöieke se' tò, e' dör Skèköl eköl ème e'. Ie' dör S'yě. Ie' dör íyi ulitane wì, ñies se' tso' ie' è a. Ñies Skèkèpa dör eköl è, e' dör Jesucristo. Íyi ulitane tso' ie' mik, ñies se' tso' ie' mik.

⁷ Erè kě s'yamipa ulitane éna iwà ane buaè tò íyi diököl tso' dalöiè, ese kòs kě wà tã'. Ie'pa bak íyi diököl ñe'se dalöiök, e' kueki e' tso'ia ie'pa er a dõ ikkè tã. Mik ie'pa tò chkè meule íyi diököl a, ese katé, eta e' ki ier tò ikkaté. Ie'pa diché kě dè'ka ierbikõ es, ese wöklö'woie. E' kueki ie'pa tò ittse tò iianekane ñáie.

⁸ Se' bats Skèköl mik e' kě dör chkè wa. Ì katekesö ò ì kě katèsö e' kě a se' onuk buaè ö suluè ie' wõa.

⁹ E' jcher a' wã, e' kueki a' tò iklö'wé tò chkè kòs katèmi a' tò. E' yène, erè a' e' kkö'nú as kě a' ukuömik s'yamipa kam éna iwà ar buaè, esepa ardöne sene sulu a.

¹⁰ Ichösö tò be' éna iane buaè, e' míã e' tkésër chkè meule íyi diököl a, ese katök iwé a. Erè e' dalewa s'yami kam éna iwà ar buaè ese eköl tò be' sué chkök tã e' tò ie' erkiöwéka tã imíã tã ikatétö ñies.

¹¹ Be' tò iwé es, e' tã e' wa be' tò se' yami, kě diché dè'ka wè', e' émine sene sulu a tã isulurdawã be' ukuömik. Ie' dör s'yami, ñies Cristo e' mettsã ttèwã ie' skéie. Be' tò iwé es, e' tã be' tò ì sulu wamblé s'yami ki.

¹² Se' tò s'yamipa kam éna iwà ar buaè, esepa ki ì sulu wamblé es, e' tã ñies se' tso' ì sulu wamblök Cristo ki.

13 E' kueki ye' ichè tò s'yami wele armine sene sulu a ye' ukuömik, iyiwak chkà katéyö e' kueki, e' ta kë ye' tò ikatepaiane.

9

Pablo tò ikanè tsatké

1 ¿Wes a' tò ibikeitsèmi tò ye' kë a kawö ta' ì woie wes ye' ki ikiane es? Wësua a' tò ibikeitseke tò ye' kë dör Jesús ttekölpa tsá e'pa eköl. Erë ye' tò Skëképa Jesús su' ye' wák wöbla wa, e' kueki moki ye' dör ie'pa eköl. A' dör ye' kanëblöke Skëképa a e' wä.

2 A' wakpa ki iwënewa tò moki ye' dör Jesús ttekölpa tsá e'pa eköl. O'kapa tò ichèmi tò ye' kë dör es, erë e' kë yënuke a' a.

3 Wépa tò ye' ché es, esepa yöki ye' e' tsatköke i' es.

4 ¿Wes a' ibikeitsèmi tò wépa wöbla'wekeyö, esepa kë kawöta ye' kimuk inuköl wa chkoie di' yoie?

5 Ñies ¿ima a' ibikeitsè tò ye' kë a kawö ta' senukwa tayë erblöke Jesús mik ese ta tsèmi e' ta wes Jesús ttekölpa malepa ena Jesús elpa ena Pedro e'pa tò iweke es?

6 ¿ima a' ibikeitsè tò ye' ena Bernabé, sa' böle kawöta kanëblök sa' wákpa ulà wa e' kkö'noie?

7 ¿Wé a' wa isuule tò ñippökwapka mi'ke, erë iwákpa e' kkö'nuke ichkè wa idi'yè wa? ¿Wé a' wa isuule tò iyiwö tkèsö, erë kë sö iwà katepa? ¿Wé a' wa isuule tò yi tso' chibo kkö'nuk, erë ese kë tò chibo tsu'diö yepa?

8-9 Ì chök ye' tso' a' a, e' kë bikeitse s'ditsö ë wa, ñies itso' kitule Moisés ttè dalöiëno ki, e' tò ichè i' es: “Baka wë'ñe tso' kanëbloie trigo wöttsoie, e' kë

kawö ta' kkö payuèwà itso' kanablök e' dalewa as trigowö katöitö." ¿Ima a' ibikeitsè? ¿Ttè dalöièno e' me'at Skököl tö baka wè'ñe è kkö'noie?

¹⁰ Au, ie' tö ime'at se' a ñies. Wépa tö iyiwö tkeke ena wépa tö ishteke, esepa tö iwakanewéke ie'pa tö iwö kak paneke e' kuèki.

¹¹ Es ñies sa' tö Wiköl Batse'r íyi tsá paka' a' a, e' dör wes iyiwö tkèsö es, e' kuèki kè idör suluè tö a' tö sa' kìmù ì tso' a' wà ese wa, e' dör wes iyiwö shtekesö es.

¹² A' wöbla'ukwakpa skà e' kkö'nuk a' kawöta, e' yita buaè a' kawöta sa' kkö'nuk.

Erè e' wà kè kine sa' wà a' a. Mik sa' bak a' ska', età sa' kè wà a' íyi kàne e' kkö'noie. Sa' kanablè' sa' wákpa ulà wa e' kkö'noie. E' dör darèrè sa' a, erè e' kos dalè'ttsè' sa' tö as kè ì tö a' wöklö'ù Cristo tté buaè e' klö'uk.

¹³ A' wà ijcher tö wépa kanablöke Skököl wé tso' Jerusalén e' a, esepa serke ì kanewéke ie'pa tö ese mik. E' wà dö tö iyiwak jcheke ie'pa tö ka' tso' imokà Skököl a e' ki, ese chkà kak tsekeat ie'pa tö katè.

¹⁴ Es ñies Skökèpa Jesús tö iyè'at tö wépa kanablöke ie' a ittè buaè pakök, esepa serdaè kanè e' mik.

¹⁵ Erè ye' kè wà íyi ikkè kine a' a yès. Ñies ye' kè ku' i' chók a' a as a' tö ye' a imù. Ye' tö Jesús tté buaè pakeke éme, e' tö ye' ttsè'wéke buaè shütè. E' kè yepattsà yi tö ye' ulà a. Ye' a ta buaè idir tö ye' duöwà, erè ye' kè tö a' ulà a ì klö'wépa.

¹⁶ Erè ye' patkèule Jesús tté buaè pakök, e' kuèki e' wa ye' kè a e' ttsè'nukka yès. Ye' kawöta iwà pakök. Ye' kè tö ipakè, e' ta iwèstela ina ye' ta!

17 Ipaköpayö ye' wák er wa, e'ma ye' wa kawö ta' s'ña'woie iki. Erë kanè e' me'at Skököl tö ye' ulà a, e' kueki ye' kawöta ipakök.

18 E' dör es e'ma çì dör iské ye' a? Ye' ttsë'ne buaë ipakök éme e' dör iské ye' a. E' wà kiane chè tö erë ye' wa kawö ta' senuk ye' kanè e' wa, erë e' kë ki ye' s'ña'weku' yës. E' tö ye' ttsë'weke buaë shute.

19 Erë ye' kë dör yi kanè méso, erë ye' e' mettsa sulitane kanè mésoie as kos ie'pa erblömi Jesús mik, ekkëpa dö erblök imik.

20 Mik ye' tso' judiowak shua, eta ye' serke wes sa' judiowak ser Moisés ttè dalöiëno dikia es as ie'pa erblö Jesús mik. Erë ye' kë ku'ia Moisés ttè dalöiëno e' dikia, erë mik ye' tso' ie'pa shua, eta idalöiekeyö as ie'pa erblö Jesús mik.

21 Es ñies mik ye' tso' pë' kë dör judiowak esepa shua, eta ye' serke wes ie'pa ser es as ie'pa erblö Jesús mik. (Erë kë ì sulu wambleku'yö. E' wà dör tö erë ye' kë ku'ia Moisés ttè dalöiëno e' dikia, erë ye' tso'ia Skököl ttè dalöiëno e' dikia, ye' tso' Cristo ttè dikia e' kueki.)

22 Mik ye' tso' s'yamipa kam éna Jesús tté wà ar buaë, esepa shua, eta ye' serke wes ie'pa ser es, as ye' a ie'pa kimer as ie'pa éna iwà ar buaë. Es mik ye' tso' pë' shua eta ye' serke wes ie'pa es as wes alé ie'pa welepa tsatkër.

23 Ì kos wekeyö e' dör Jesús tté buaë kí shköwoie as iwà döñak ye' ulà a.

24 A' wa ijcher tö mik se' turke tseë isuöie tö wé e' alömi, eta iturkerak seraa, erë eköl ë e' alömi, ese ulà a iské döraë. E' sù a' senú Skököl a buaë as iské dö a' ulà a wes wé e' alé ese ulà a iské de es.

25 Tunukwakpa ulitane e' kkö'nuke, e' yuöke kekraë e' aloka imalepa ki. Ì kos tö ie'pa wöklö'wëmi, e' olo'yeye ie'pa tö. E' kos weke ie'pa tö as kal kö yuekerakitö wöshkie* tkëka iwökir ki, ese dö ie'pa ulà a ie' alérak e' skéie. Iské e' chklörtä'wä, erë se' iyuleke, e' dör yöbië kë chklörtä'wä.

26 Ye' serke Skököl a wes yi tur e' aloka ese es, kë dör wes tunukwak turke éanas ese es. Ye' kë dör wes ñippökwak tö iulà tsiní uyeke é siwä' ki, kë wä tä' ese es.

27 Ye' e' wöklö'uke darërë, ye' chkà kekeyö kësik wa as tö iù wes Skököl ki ikiane es. E' wekeyö es dö' ye' s'pattë tajë Skökëpa ttë wa, erë ye' wák kë ulà a iské dö.

10

Kë a' minuk iyi diököl dalöie ese wé a

¹ A yamipa, ye' kë ki ikiane tö a' éna ichöwa tö ì bak se' yamipa bak ká iaiäë Moisés kéwö ska' e'pa ta. Ie'pa kos wëttse' Skököl tö mò àr tajë e' wa. Ñies Skököl diché wa ie'pa kos baktsä klö wa dayë kië Dayë Mat, e' shüa kë nune'ka dayë wä.

² E' dör wes ie'pa wösunerak mò a ena dayë a es iwà kkachoie tö ie'pa batsulewä Moisés mik.

³ Es ñies chkè mé Skököl wák tö ie'pa a, e' é ñé ie'pa ulitane tö.

⁴ Ñies di' mé ie' wák tö ie'pa a, e' é yé ie'pa ulitane tö. Di' e' döwëttsaitö ákkuö a. Ákkuö e' tö Cristo wä ché, e' mir ie'pa tä kekraë ikimukrak.

* **9:25 kal kö yöule wöshkie:** E' merke tunukwakpa e' alé esepa a, e' kkecheke ie'pa tö tajë. Wé ki itkëneka ese wák dalöiërtä' tajë.

⁵ Erë ie'pa kibiiepa kë wër Skëköl wa buaë. E' kueki ie'pa kibiiepa durulune, nu aṭe tkëṭer ká wañe ká sir poë e' ki.

⁶ E' koṣ tka ie'pa ṭa se' a iwà kkachöie tö kë se' kàne ì sulu kkechök weṣ ie'pa tö ikkeyë' es.

⁷ Se' kë kàne íyi diököl dalöioök weṣ ie'pa welepa tö idalöie' es. Ì wamblë' ie'pa tö e' tso' kitule Skëköl yëkkuö ki. E' tö ichè: “Ie'pa e' tuléwa chkök di'yök taië buaë íyi diököl dalöioie. E' ukuöki ṭa ie' kékarak klötök trënuκ ì sulu wamblök taië e' ttsë'wokarak buaë.”*

⁸ Kë se' kàne trënuκ weṣ ie'pa welepa trënerak es, e' nuí ki ie'pa taië e'pa durulune ká etkë a döka 23,000.

⁹ Kë se' kàne Cristo wöñatkök ì sulu wa weṣ ie'pa welepa iwöñatkë' es, e' nuí ki ie'pa kötulur tkabë wä.

¹⁰ Kë se' kàne kköchökka Skëköl wöa weṣ ie'pa welepa kköyë'ka es, e' nuí ki S'ttökulurwak tö ie'pa kötulur.

¹¹ Íyi ekkë koṣ tka s'yamipa bak ká iaiaë, e'pa ṭa iwà kkachöie se' a tö se' kë kàne ì sulu wamblök weṣ ie'pa es. E' koṣ kiteat Skëköl yëkkuö ki se' serke ìñe ṭa ká i' erkewatke e' kéwö ska', esepa a ikkachöie tö wépa tö Skëköl watéttsa, esepa weirdaë inuí ki.

¹² A' welepa e' bikeitsö tö “ye' e' tkéwa darëre Jesús mik, kë ye' arpamine ì sulu a.” Ese wakpa kawöṭa senuκ erki aṣ kë iarmine ì sulu a.

¹³ Se' erkirke ì sulu wamblök, ese koṣ tköke suli-tane ṭa. Erë Skëköl ttö mokië, ie' kë tö se' mepattsa tö ì sulu tö se' erkiöwë taië shute kë se' a iwöklör

* **10:7** Éxodo 32.6

ekkë. Mik se' erkiöweke ì sulu tö, etä ie' tö se' a ikkacheraë wës se' tköshkarmi iulà a as se' a iwöklör.

14 A yamipa, a' dalër tajë ye' éna, íyi diököl tso' dalöiè ese kôs yöki a' tköshkar bánet.

15 A' kabikeitsö buaë, e' kueki ì chekeyö a' a, e' bikeitsö tã a' isueraë tö mokië idir.

16 Mik se' ñi dapa'uke Cristo kötewã e' këwö tkö'uk, etä wëstela chësö Skëköl a vino yekesö ñita tka' etkë a e' ki. Vino ñe' tö ie' pë tene tajë s'tsatkoie e' wà chë. E' wa se' kôs tso' batsulewã ie' mik. Ñies pan etö ë blatesesö ñi a e' ñekesö ñita. E' tö ie' chkà wà chë. E' wa se' kôs tso' batsulewã ie' mik.

17 Se' dör tajë, e' kôs tö pan etö ë e' ñeke, e' kueki se' kôs dör wës wák eköl ë es.

18 Ì weke Israel aleripa tö e' wà bikeitsö. Mik ie'pa tö iyiwak jcheke ka' tso' imoka Skëköl a e' ki, etä wëpa tö ese chkà kak kateke, esepa kôs tso' ie' dalöiök ñita. Es ñies a' mi'ke íyi diököl dalöio wé a, tã chkè meule íyi diököl a, ese kak katé a' tö, e' tã a' tso' idalöiök ie'pa tã ñita.

19 E' wa ye' kë ku' ichök tö íyi diököl ese ena chkè meule ia ese diché tã'.

20 Au, kë idör es. Ye' tso' ichök tö pë' kë tö Skëköl dalöiè esepa tö iyiwak jcheke më íyi diököl a, ñermata e' meule aknamapa a, kë meule Skëköl ichök e' a. Ye' kë ki ikiane tö a' e' tiü aknamapa íyi shua yës.

21 A' kë a Skëképa Jesús tka' ena aknamapa tka' e' wà yanuk ñita. A' kë a Skëképa chkè ena aknamapa chkè katanuk ñita.

22 Iwésö es, e' tã s'tso' Skëképa tsiriuk as isibirka s'ki. Ie' uluneka s'ki, e' tã ¿wës e' dalë'ttsërmi siã?

Ì kòs ú Skèkòl ě kíkoka

23 A' wèlepa tò icheke tò “se' wà kàwö tso', ì kòs kiane se' k̄i wè, ese wòie.” E' yène erè kè ì ulitane e' dör buaë se' a wè. Ì kòs kiane se' k̄i wè, e' wèmisö, erè kè ì ulitane a s'yamipa er diché iènuke.

24 Se' kè kàne tkinuk se' wák ě k̄i. Nies s'kàwöta tkinuk s'malepa k̄i.

25-26 Skèkòl yèkkuö tò ichè: “Ká i' ena íyi kòs tso' ik̄i, e' dör Skèkòl icha.”† E' kuèk̄i iyiwak chkà watorke iwé a, ese kòs katèmisö. Kè iwà chakar tò imeule íyi diökòl a ö au as s'er kè tò s'kkatö ik̄i.

27 Yi kè erblöta' Jesús mik, ese eköl tò a' wèle kié chkök ie' ta, ta a' shkak, e' ta a' yú. Ì kòs wà a' dène e' katö bèrè kè ichakar as a' er kè tò a' kkatö ik̄i.

28 Erè o'ka tò a' a' iché: “Iyiwak chkà se' meule íyi diökòl a”, e' ta kè ikatar ie' dalèrmik, ñies erbikè dalèrmik.

29 Ye' tso' ie' erbikè chök, ye' kè ku' a' erbikè chök.

Ye' a' kàwö ta' iyiwak chkà ulitane katök, ¿wes e' kè katepayö, imène sulu o'ka k̄i e' ě kuèk̄i?

30 Ì kateke ye' tò, ese k̄i ye' tò wèstela cheke Skèkòl a, e' ta ¿wes e' sulurmi o'ka yöki? ¿Wes e' k̄i ie' tò ye' chèmi suluë?

31 E' kuèk̄i ì kòs yekesö, ñekesö, ñies ì kòs wèkesö, e' ùsö as Skèkòl k̄ikarka.

32 A' senú wösh wa as kè yi wöklör a' ukuömik. Judiowak idir ö kè idör judiowak ö wépa dör Skèkòl icha ese idir, ese kòs kè wöklö'war.

33 A' senú wes ye' serke es. Ye' wák e' ché senuk kekraë as e' wër buaë sulitane wa. Ye' kè tkirku' ye' wák k̄i. Ye' tkirke sulitane k̄i ie'pa kimoie as itsatkèrdak.

† 10:25-26 Salmo 24.1

11

1 A' senú wes ye' serke es. Ye' serke wes Cristo ser es.

Wes alakölpa kawöta e' uk mik se' ñi dapa'uke eta

2 Kekrae a' er arke ye' ska'. Ñies ì kos wa ye' to a' woblao', e' wekeia a' to. E' kueki ye' tso' a' kikokka.

3 Ere ye' ki ikiane to a' wa ijcher to Cristo dor wepa dor ie' icha esepa kos wokir. Ñies wem dor alakol wokir. Ñies Skekol dor Cristo wokir.

4 Mik a' ñi dapa'uke ttok Skekol ta, eta a' wepa welepa ttoke ie' ta o ile chekerakito ie' ttekolie ta iwokir pabakekewaito, e' ta e' wa yi dor iwokir e' dalosewekewaito.

5 E' skeie ke dor es alakölpa a. Ie'pa ttoke Skekol ta o ile chekerakito ie' ttekolie, ke wokir pabakulewa, e' ta e' wa ie'pa to yi dor iwokir e' dalosewewa. Ie'pa dor wes alakölpa tsa to dabebe esepa es.

6 Alakol wele ke ena iwokir pabakakwa, e' ta ese mu to itsa tee wes wem es. Ere e' dor jae taje ie' a. E' kueki buae idir ie' a to iwokir pabakowa.

7-9 Skekol to wem yo' wes ie' wak es, e' kueki wes ie' dor e' werke wem ki. E' kueki wepa ke kane iwokir pabakokwa mik ittoke ie' ta e' dalewa. Ere alakol de'ka wem wa, e' ke dor to wem de'ka alakol wa. Ñies alakol yone wem kueki ikimoie, e' ke dor to wem yone alakol kueki. E' kueki wes wem dor e' werke alakol ki.

10 E' kueki alakölpa ke e' wa kkachok iwokir pabakewa wa. Ñies ie'pa ke e' uk Skekol biyochokwaka kueki.

11 Erë alakölpa ena wëpa batsulewā Skëkëpa mik esepa kë meneat ulawa ulawa ñi yöki. E' skéie imeneat ñi kimuk ñi dalöiök.

12 Mokï tö alaköl tsá dë'ka wëm tsá wa. Erë ñies e' ukuökï ta wëpa ulitane kūrke alaköl wa. Erë se' kōs ena İyi kōs, e' dë'ka Skëköl wa.

13 A' wakpa tö ibikeitsö. ¿Buaë idir tö alakölpa ttöke Skëköl ta wökir kë pabakule?

14 Sulitane wā ijcher tö iwake' meneatbak tö wëm tsà batsi, e' dör jaë.

15 Erë alaköl tsà batsi, e' mène ie' a iwökir pabakoie, e' kueki e' mène buaë ie' ki ikikoka.

16 Yile kë wā ye' sini'kune, e' ta ese éna ianú tö se' dör Skëköl icha erule erule ñi dapa'uke ká wa'ñe, e'pa kōs wöblar tö alakölpa ttöke Skëköl ta wökir pabakulewā.

Wes se' ké Skëkëpa kötewā e' kēwö tkö'uk

17 İ cheke ye' tö a' a' i' ta, e' kë ki ye' a' a' peñanuk. Mik a' ñi dapa'uke, eta e' wà dettsa suluë ichök İ buaë tsata.

18 Keweie yö ichè tö ye' wā ibiyö jcher tö mik a' ñi dapa'uke, eta a' ñi blabatsélor. Wele ta ye' iklö'wé tö e' dör mokï.

19 Mokï e' dör buaë tö a' ñi blabatsö as iwërwa a' shua tö a' wëpa wër mokï Skëköl wa buaë.

20-21 Mik a' ñi dapa'uke Skëkëpa kötewā e' kēwö tkö'woie chkè wa di'yè wa, eta a' wákpa tö a' chkè ñéwā kë wā iyamipa kë wā İ ta' esepa bikeitse. Bataie ta a' welepa ate kë chkaule welepa e' ttéka tajë blo' wa. E' wa İ ché a' tö tö ikéwö tkö'weke a' tö e' dalösewéwā a' tö.

22 Wësua a' kě u ta' chkoie di'yoie. Wësua se' dör Skëköl icha e'pa dalösewekewa a' tö. Wësua a' éna s'yamipa dör siarë, esepa jaëwakkä. ¿Ì chëmiyö a' a' íyi ekkë kuëki? ¿A' ki ikiane tö ye' tö a' peñë iki? Au, ye' kě tö iwëpa.

23 Skëkëpa Jesús tté meneat ye' a paka'neyö a' a, e' dör i' es: Nañewe kam ie' merittsa, e' yöki ie' tö pan klö'wé.

24 E' ki wëstela chéitö Skëköl a. E' ukuöki ta' iblatéitö ta' iché: “Pan i' dör ye' chkà merdattsa a' tsatkoie e'. I' ú kekraë as a' er arne ye' ska'.”

25 Es ñies mik ie'pa chké one ta' tka' a' vino tkër, e' klö'wéitö ta' iché: “Vino i' dör ye' pë. Ye' tterawa e' pë tërdaë, e' wa ttë pa' ali me' Skëköl tö, e' wà de. Bitökicha a' tö iyeke, eta' a' er anú ye' ska'.”

26 Es bitökicha a' tö pan ñe' ñé ena vino ñe' yé, e' wa a' tso' ichök tö ie' kôtewa se' skéie. Es a' tö ichë michoë dö mik ie' datskene eta'.

27 E' kuëki yi isie tö pan ñe' ñé ena vino ñe' yé, erë kě iserku' wës kawö tkö'weke ñe' wà kiane chë es, e' ta' esepa tso' Skëkëpa chkà ena ipë dalöseukwa.

28-29 Inésö ena iyésö, erë s'yamipa malepa dör wës wák eköl ë es se' ta' Skëkëpa batamik, esepa dalösewewasö, e' ta' Skëköl wö kiekésö e' ki. E' kuëki se' kos eköl eköl kawöta' e' sauk kewe tö is s'tso', e' ukuöki ta' pan ñú ena vino yó.

30 Erë a' kě ku' iwà dalöiök es. E' kuëki a' taië kirirke ianewa alabëbë, ñies a' welepa duolur.

31 Se' e' sué buaë, e' ma Skëkëpa kě tö se' shulepa.

32 Erë ie' tö se' shuleke, e' ta' e' dör se' kimoie as se' kě kichatër aishkuö ta' wëpa kě tö ie' dalöieta' esepa ta' ñita.

³³ A yamipa, mik a' ñi dapa'uke chkök ñita Skëkëpa kötëwä e' këwö tkö'woie, etä a' ñi panú.

³⁴ A wépa dué bli wä, e' ta esepa chköbitü iwák u a as a' kë tö Skëköl wö kiö e' ki a' ñi dapa'uke chkök ñita e' wa. Íyi malë kianeia shulè, ese shulekeyö mik ye' dene a' ska' etä.

12

Ì merke Wiköl Batse'r wa e' pakè

¹ A yamipa, i' ta ye' tö ì merke Wiköl Batse'r wa se' a e' ttè pakeke a' a. Ye' ki ikiane tö a' éna ttè e' wà ar buaë.

² A wä ijcher buaë tö kenet ta kam a' tö Skëköl dalöiö, e' yöki a' bak e' muktsa wëttsë wës alè íyi diököl kë ttö ta', ese dalöiök.

³ E' kueki i'ñe ta ye' ki ikiane tö a' wä ijcher tö wépa ttöke Skëköl Wiköl wa, esepa kë tö ichepa: “¡Jesús mú kichatër!” E' sù wépa kë ttöku' Wiköl Batse'r wa, esepa kë tö ichepa mokj: “¡Jesús dör sulitane Këkö!”

⁴ Ì mène se' a ñi kimoie ese dör kua'ki kua'ki, erë e' wì dör Skëköl Wiköl eköl ë.

⁵ E' sù kanè tso' se' wä s'kimoie ese dör kua'ki kua'ki, erë e' wì dör Skëkëpa Jesús eköl ë.

⁶ E' sù ì wëkesö ese wà dökettsa kua'ki kua'ki, erë e' wì dör Skëköl eköl ë, e' tö iwakaneweke se' a as iwà döttsa wës ie' ki ikiane es.

⁷ Se' kos eköl eköl a imène Skëköl Wiköl wa s'malepa kimoie.

⁸ Welepa a imerke Skëköl Wiköl wa Skëköl siwé iskië e' pakoie. Welepa skà a Wiköl e' ë wa imerke ttè blëule ese wà pakoie.

9 Welepa skà a imerke Wiköl e' ã wa erbloie Skëköl mik bua'ie. Welepa skà a imerke Wiköl e' ã wa s'duöke ese bua'wone.

10 Welepa skà a imerke i kë or yi a ese woie. Welepa skà a imerke ttoie Skëköl ttekölie. Welepa skà a imerke isuoie tö yile kapaköke ese dör Skëköl ttè moki ö au. Welepa skà a imerke ttoie ttö kuä'ki kuä'ki wa. Welepa skà a imerke wépa ttöke ttö kuä'ki kuä'ki wa, ese wà pakone.

11 Erë ekkë kos dör Skëköl Wiköl eköl ã e' kanè. Ie' tö imeke se' kos a eköl eköl wes ie' ki ikiane es.

12-13 Se' dör Cristo icha e'pa dör wes wák eköl ã es. Se' ulà ta', klö ta' ena se' yese skà tso' tajë, erë e' kos wöieulewà etkëme. Es ñies se' dör kuä'ki kuä'ki. Se' welepa dör judiowak, se' welepa skà kë dör judiowak, se' welepa klöulewà kanè mésoie, se' welepa skà kë dör es. Erë se' kos iënewà Skëköl Wiköl a, e' ã a se' kos tso'. E' wa se' de wes wák eköl ã es Cristo ta' ñita.

14 S'chkà kë dör etkëme, iyese tso' tajë kuä'ki kuä'ki.

15 Ichösö tö s'klö mú tö ichè: “Ye' kë dör ulà, e' kuëki ye' kë ku' chkà mik.” Ie' tö ichèmi es, erë ie' tso' chkà mik.

16 S'kukuõña mú tö ichè: “Ye' kë dör wöbla, e' kuëki ye' kë ku' chkà mik.” Ie' tö ichèmi es, erë ie' tso' chkà mik.

17 S'chkà kos e' mú dör wöbla ã, e'ma ¿wes ì ttsëmisö? S'chkà kos e' mú dör kukuõña ã, e'ma ¿i wa íyi alar ttsëmisö?

18 Erë Skëköl kë wà se' chkà yöne es. Ie' tö ì kos tso' s'chkà mik, e' méat wé ie' ki ikiane mèat eë as ikaneblö buaë ñita.

19 Es s'chkà ulitane mú dör wöbla ě ö kukuöña ě, e'ma s'chkà kě dör moki.

20 Erě kě idör es. S'yese tso' tajě.

21 E' kuęki s'wöbla kě a iyėnuk s'ulà a: “Be' kě dör ĩe bua' ye' a.” Es ñies s'wökir kě a iyėnuk s'klö a: “Be' kě dör ĩe bua' ye' a.”

22 E' skėie, s'chkà wėsele bikeitsekėsö tō kě ĩa ĩ or buaě, e' kě ta' etā kě se' serpa.

23 S'chkà wėsele ki se' jaěrke, kě kkayěr ta', ese paiekėsö buaě datsi' wa kkö'neke buaě.

24 Erě s'chkà wėsele kě ki se' jaěrku', e' kě paieku'sö datsi' wa. S'chkà wėsele bikeitsekėsö tō kě idör buaě chökle, ese kkö'nekesö bua'ie. Es Skėköl tō s'chkà tulu'wa.

25 Ie' tō iwė es as s'chkà kě ñi blabatsö e' skėie ĩni kkö'nurak buaě ñikkė.

26 Se' yese alė dalėne s'mik, e' ta' s'chkà kos e' tō ittś. Ñies se' yese alė peñarke buaě, e' ta' s'chkà kos e' ttsė'ne buaě.

27 A' kos eköl eköl tso' batsulewa Cristo mik wė wák eköl ě es.

28 Se' dör Skėkėpa Jesús icha e'pa shua Skėköl tō se' tkė'ka kanė kuā'ki kuā'ki uk. Kewe ie' tō Jesús ttekölpa tsá, e'pa tkė'ka. E' ukuöki ta' ittekölpa malepa tkėneka. E' ukuöki ta' s'wöbla'ukwakpa ittė wa esepa tkėneka. E' ukuöki ta' ĩ kě or yi a ese ukwakpa tkėneka, ñies s'duöke ese bua'ukwakpa ena s'kimukwakpa ena s'wėttsukwakpa esepa tkėneka. Ñies wėpa ttöke ttö kuā'ki kuā'ki wa, esepa tkėneka.

29 Se' ulitane kě dör Jesús ttekölpa tsá. Se' ulitane kě dör Skėköl ttekölpa. Se' ulitane kě dör

s'wöbla'ukwakpa. Se' ulitane kë dör ì kë or yi a ese ukwakpa.

³⁰ Se' ulitane kë dör s'duöke ese bua'ukwakpa. Se' ulitane kë ttöpa ttö kuä'kì kuä'kì wa. Ì chekerakitö ttö kuä'kì kuä'kì wa, ese wà kë pakanukne se' ulitane a.

³¹ Erë ì merke se' a Wiköl Batse'r wa, e' bua'ie yulö a' dör poë.

Se' ñì dalëritsö e' dör ñalä bua'ie

Erë ñalä bua'ie shute, e' kkachekeyö a' a' i' ta.

13

¹ S'ttö kuä'kì kuä'kì dö Skëköl biyöchökwakpa ttö e' kos mú yër ye' a, erë s'malepa kë dalër ye' éna, e' ta ye' dör wes tabechka ppésö ese blar es ö wes panakkuö ppésö ese blar es kë wà ta'.

² Ye' mú ttö Skëköl ttekölie, ñies ie' siwé blëule e' kos mú ar ye' éna ñies íyi kos mú jcher ye' wä ñies ye' mú erblö Skëköl mik taië dö kabata skéu ekkë, erë s'malepa kë dalër ye' éna, e' ta ye' kë dör ì.

³ Ì kos tso' ye' wä e' mú mëttsayö s'siarëpa a, ñies ye' wák mú e' mùttsa we'ikè siarë Skëköl ttè kuekì e' ttsoka*, erë s'malepa kë dalër ye' éna, e' ta e' kë dör ìie bua' ye' a.

⁴ Se' ñì dalëritsöke, e' ta ì kos dalë'ttsekese bërë, ñies se' er buaë chöke s'malepa a. Se' ñì dalëritsöke, e' ta kë se' ukyertä' ñì kì, kë se' e' ttsötä'kä s'malepa kì, kë se' e' bikeitsötä'kä tö se' dör pë' taië.

* **13:3 ye' wák mú e' mùttsa we'ikè siarë:** Yëkkuö këchke wele tö ichè: ye' mú e' mùttsa ña'wèwa

5 Se' ñi dalëritsöke, e' ta kë s'malepa suèsö er sulu wa, kë se' er muta'wa se' wák ë ki, kë se' ulurta'ka bet, ì sulu wamblërke se' ta, e' ta ese nuí olo'yekesö.

6 Se' ñi dalëritsöke, e' ta ì sulu wamblërke ese kë tö se' ttsë'wepa buaë. E' skéie mik s'malepa serke wes ttë mokì tö ichè es, e' ta ese je' tö se' ttsë'weke buaë.

7 Se' ñi dalëritsöke, e' ta ì kos dalë'ttsekösö, se' erblö michoë Skëköl mik, ì buaë yë' Skëköl tö se' a ese kos wà panekesö kröröë, ì kos wöklö'wekesö.

8 Se' ñi dalëritsöke e' kë erta'wa. I'ñe ta imerke ttoie Skëköl ttekölie, erë aishkuö ta e' kë merpaia es. I'ñe ta imerke ttoie ttö kua'ki kua'ki wa, erë aishkuö ta e' kë ku'ia. I'ñe ta imerke íyi blëule ese jchenoie Wiköl Batse'r wa, erë aishkuö ta e' erdawa.

9 E' wà dör tö ì mène se' a jchenoie i'ñe ta ese kë dör Skëköl íyi wa'ñe, e' dör ikakla ë. Ñies ì chekesö Skëköl ttekölie, ese kë dör seraa.

10 Ese kos erdawa mik ì dör ibua'ie e' de seraa eta.

11 E' dör i' es: Mik ye' ià alala, eta ye' ttöke wes alala es, ye' erbiköke wes alala es, íyi suekeyö wes alala es. Erë mik ye' kibineone, eta ye' kë dör alala, e' kueki ye' kë seria wes alala es.

12 I'ñe ta se' wa Skëköl jcher wes íyi olo suèsö wösuö nula wa es. Erë aishkuö ta isuerasö ñi wöshäë. I'ñe ta ie' kak jcher ye' wa, erë aishkuö ta ijcherdawa ye' wa buaë wes ie' wa ye' jcher buaë es.

13 I'ñe ta se' erblöke Skëköl mik. Ñies ì yë'atbakitö, ese wà panekesö kröröë. Ñies se' ñi dalëritsöke. Íyi

mañat ekkè wawekesö i'ñe ta, erè ibua'ie dör se' ñi dalëritsö.

14

Imène ttoie ttö kuä'kí kuä'kí wa, e' pakè

¹ A' e' chö ñi dalëritsök buaë. Ñies ì merke se' a Wiköl Batse'r wa ñi kimoie ese yulö poë. Erè ttök Skëköl ttekölie e' yulö bua'ie imalepa tsata.

² E' wà dör tö yi a imène ttoie ttö kuä'kí wa ese kë ttöku' imalepa ta, ittöke Skëköl ë ta. Kë yi skà éna ittöke e' anuk. Erè ttè blëulewä ese chekeitö Skëköl Wiköl wa.

³ Erè yi a imène ttoie Skëköl ttekölie, ese ttöke imalepa ta ie'pa er diché kí ioie, ie'pa pattoie ena ie'pa er pabloie.

⁴ Yi ttöke ttö kuä'kí wa Wiköl Batse'r wa, ese tö iwák ë er diché kí ieke. Erè yi ttöke Skëköl ttekölie, ese tö Skëköpa Jesús icha malepa er diché kí ieke.

⁵ Ye' kí ikiane tö a' ulitane mú a imer ttoie ttö kuä'kí kuä'kí wa. Erè a' mú ttö Skëköl ttekölpaie, e' dör ibua'ie ttök ttö kuä'kí kuä'kí wa ese tsata. Erè a' ttöke ttö kuä'kí kuä'kí wa ta yile tö iwà pakène imalepa a as ie'pa er diché kí ièr, e' ta e' dör buaë wes yi ttöke Skëköl ttekölie ese es.

⁶ A yamipa, e' wà pakekeyö a' a i' es. Ichösö tö ye' de, e' ttöke a' ta ttö kuä'kí wa, e' ta ze' tö a' kìmèmi? Au, e' kë dör iie bua'. Erè ilè kkayène ye' a ese chényö a' a ö ilè jcher ye' wä ese pakényö ö ilè chéyö Skëköl ttekölie ö a' wöbla'wéyö ttè wésele wa ese kōs chéyö a' wákpa ttö wa, e' ta e' je' tö a' kìmèmi buaë.

7 E' dör wēs ma'ma tso' blarta' pulē sù ö ma'ma kicha ta' sù ese blar es. Kē iblane wēs ikawōta bla'wè es, e' ta çì se' a ichök tō ì bla'wekerakitō?

8 Ñies duk bla'weke ñippökwakpa kioie ñippök ibolökpa ta, e' kē blane wēs ibla'weke es, e' ta ñippökwakpa kē bitúpa ñippök.

9 E' sù a' ta itköke. A' ttöke ttö kuä'ki kuä'ki wa, e' ta çwēs e' wà armi yi éna? A' ttöke é, wēs yi ttö ekörla ese es.

10 S'ttö daklilië, e' tso' tajë ká i' a, ese kōs wà ane iwákpa éna.

11 Erë wele ttöke iwákpa ttö wa, kē wà ane ye' éna, e' ttséyö, e' ta ie' dör ká kuä'ki wak ye' a, ñies ye' dör ká kuä'ki wak ie' a.

12 Ì meke Skököl tō se' a iWiköl wa, ese kōs yuleke a' tō poë. E' kuëki yō ichè a' a, e' wése tō se' malepa dör Skökëpa icha e'pa er diché kí ieke, ese kōs yulö bua'iewa.

13 E' kuëki yi ttöke ttö kuä'ki wa ese wák tō ikiö Skököl a as imütö ie' a iwà pakone imalepa a.

14 Ichösö tō ye' tso' ttök Skököl ta ttö kuä'ki wa, e' ta mokì ye' tso' ttök ie' ta, erë iwà kē ane ye' wák éna.

15 Çwēs ye' iwèmi? Ye' iwëke i' es: ye' ttöke Skököl ta ttö kuä'ki wa, ñies ye' ttöke ie' ta ttö ane ye' éna ese wa. E' sù ye' ttsöke ie' kikokaie ttö kuä'ki wa, erë ñies ye' ttsöke ttö ane ye' éna ese wa.

16 Ichösö tō a' wele tso' wéstela chök Skököl a ttö kuä'ki wa a' malepa kukua, erë iwà kē ane a' éna, e' ta çwēs a' ichèmi, “Es e' idir”?

17 Mokì ie' tō wéstela ché buaë Skököl a, erë e' kē wa a' er diché kí iëne.

18 Ye' ttöke ttö kuä'kī wa taië a' tsata, e' kī ye' tö wëstela cheke Skëköl a.

19 Erë mik se' ñi dapa'uke, eta ee ye' a ta ye' kapaköke ttë böt mañat wà ane se' éna ese wa, e' dör buaë ye' kapaköke ttë taië ttö kuä'kī wa döka 10.000 kë ane yi éna e' skéie.

20 A yamipa, kë a' kabikeitsökia wës ala'rla es. A' kabikeitsö wës s'kibinetke es. Erë buaë idir tö sene sulu yöki a' kabikeitsö wës ala'rla es.

21 Skëköl tö ichë iyëkkuö kī i' es: “Erë ye' ttöraë ká i' wakpa ta s'ttö kuä'kī kuä'kī wa ena ká kuä'kī kuä'kī wakpa wa, erë ie'pa kë tö ye' ttö iutepa.”

22 E' wa isuésö tö s'ttöke ttö kuä'kī wa e' dör ilë kkachoie wépa kë erblöta' Jesús mik esepa a, kë idör se' erblö Jesús mik esepa a. Erë se' ttöke Skëköl ttekölie e' je' dör se' erblö ie' mik esepa a.

23 E' wà dör i' es: A' ñi dapa'uke e' kos tso' ttök ttö kuä'kī kuä'kī kë ane yi éna ese wa, e' wösha pè' kë yöne Jesús ttë wa kë erblöta' ie' mik, esepa dewa a' shua, e' ta ie'pa tö ibikeitseraë tö a' dör aljie.

24 Erë e' skéie a' ulitane ttöke Skëköl ttekölie wà ane sulitane éna ta pè' kë erblöta' Jesús mik kë yöne ie' ttë wa esepa dewa, e' ta ie'pa éna iardaë tö nuì tso' ie'pa kī ta ie'pa e' shulöraë.

25 Ì tso' blëule ie'pa er a, ese yëneká sulitane kukua ta ie'pa e' tköralur kuchë kī Skëköl dalöioie ta icheraërakitö, “Mokī Skëköl tso' a' ta.”

A' ñi dapa'ú bërë kë chiliwarka

26 A yamipa, ttë ikkë kos bata dör i' es: Mik a' ñi dapa'uke, eta a' ulitane wà ilë bitumi eköl eköl s'malepa er diché ioie. A' wële wà Salmo bitumi ttsoie. A' wële skà wà ttë tso' s'wöbla'woie. A' wële

skà wà ttè kkaché Skèköl tō ese tso' chē. A' wēle wa ilè skà tso' chē ttō kuā'kī wa. A' wēle wà ì yēne ttō kuā'kī wa, e' wà pakè tso'ne. E' kōs ú ñi er diché ioie.

²⁷ A' wépa ttōke ttō kuā'kī kuā'kī wa, e' tã buaē idir tō bōl è ttō, isalema mañal, erē e' dōr wē'. Ñies esepa kawōtã ttōk ekōl ekōl. Ñies ì chekerakitō e' wà pakōkne yile kawōtã.

²⁸ Erē kē yi ku' iwà pakōkne, e' tã ie'pa kawōtã siwã'blōkwã. As ie'pa ttō Skèköl tã ttō kuā'kī wa bánet ekōrla.

²⁹ Es ñies wépa a imène ttoie Skèköl ttekōlie, esepa ttō bōl ò mañal, e' ukuōki tã a' malepa tō iwà bikeitsō isuoie tō moki idir ò au.

³⁰ Erē a' wēle ttōke Skèköl ttekōlie, e' dalewa a' wēle skà tkēr eē, ese a Skèköl tō ittē é ñies, e' tã wé tso' ttōk ese siwã'blō as ièköl tō icha chō.

³¹ Es a' ulitane ttōmi Skèköl ttekōlie ekōl ekōl as a' ulitane wōblar ena a' ulitane a diché kī iēr.

³²⁻³³ Skèköl dōr sene bēre mukwak e' kē chilirtã'kã. E' kuēkī ie' kī ikiane tō se' ñi dapa'ù bēre, kē chilirtã'kã wes s'batse'rpa erule erule ñi dapa'uke kã wa'ñe es. E' kuēkī wépa a imène ttoie Skèköl ttekōlpaie, esepa a e' wōklōrmi as ittō ekōl ekōl.

³⁴ Mik a' ñi dapa'uke, etã alakōlpa kōs ké siwã'blōkwã. Ie'pa kē kãne ttōk, e' skéie ie'pa ké ittōk bēre wes Skèköl ttè dalōiēno tō ichē es.

³⁵ Ie'pa ttōke mik a' ñi dapa'uke, e' dalewa e' dōr jaē. E' kuēkī ie'pa éna ilè chakak, e' tã as ichakōrakitō iwēm a iu a.

³⁶ ¿Ima a' ibikeitsè? ¿Skèköl ttè de a' batamik? ¿A' è ulà a ide? Au. ¡A' e' kité!

37 Yi e' bikeitsõ tö ie' dör Skëköl tteköl ö Wiköl Batse'r tö ie' ké ichök, e' ta ese kawõtã ichök tö ì shteke ye' tö a' a e' dör ì uk se' patkë' Skëkëpa Jesús tö e'.

38 Erë yi tö ttè i' watéttsa, ese watërdattsa.

39 A yamipa, es ye' tö a' a ichè tö ttök Skëköl ttekölie, e' yulõ poë. Ñies wëpa ttöke ttõ kua'kì wa, esepa kë wöklõ'war.

40 Erë íyi kos ese ú a' tö buaë yësyësë, kë chiliwarka.

15

Cristo shkënekane, e' pakè

1 A yamipa, Jesús ttë buaë paka' ye' tö a' a, e' skà pakekeneyö a' a i' ta as e' ska' a' er döne. Ttè ñe' klõ'bak a' tö, e' a a' tso' tkëulewã darërëë.

2 A e' tkéwã michoë ttë buaë ñe' a yësyësë wës ye' tö a' a iwà paka' es, e' ta e' wa a' tsatkëne. Kë idör es, e' ta ë ichök a' erblé imik.

3 Ttè meneat ye' a, e' ë paka'neyö a' a. E' bua'ie dör i' es: Cristo kötëwã se' nuì kì wës itso' kitule Skëköl yëkkuö kì es.

4 Ñies ie' wötënewã pö a, e' kì kã de mañat, etã ishënekane wës itso' kitule Skëköl yëkkuö kì es.

5 Ñies ie' kkaché Cefas a. E' ukuökì ta ie' kkaché ittekõlpa tsá dabom eyök kì bõl (12), e'pa a.

6 E' ukuökì ta ie' kkaché s'yamipa dõkã cien skeyök (500) kità, e'pa a mik iñi dapa'wé ek tsiní ëme etã. Ie'pa ekkëpa welepa blërulunetke, erë ikibiiepa dobyërkeia.

7 E' ukuökì ta ie' e' kkaché Santiago a. E' ukuökì ta ie' e' kkaché ittekõlpa kos a.

⁸ Bata ekkë ta ie' e' kkaché ye' a. Ye' dör ittekölpa tsá e'pa yulë, erë ñies ie' e' kkaché ye' a.

⁹ Skëköl icha, e'pa we'ikök ye' bak. E' kuëki ye' dör ittekölpa malepa dikia diöshet. Ye' kiök ie'pa eköl, e' kë dör ye' siarla e' a.

¹⁰ Erë Skëköl er buaë ché ye' a, e' kuëki ye' dör ie'pa eköl. Ie' er buaë ché ye' a e' kë dör éme. E' wakanewéyö tajë ie'pa malepa tsata. Ñermata kë dör tö ye' wák tö iwakanewé. Iwakanewéyö Skëköl er buaë chö ye' a e' batamik.

¹¹ Erë Jesús tté buaë, e' dör etkëme, e' paka' sa' tö a' a, e' mik a' erblé. Ye' tö ipakë ö ie'pa tö ipakë, e' kë dë' wes.

Se' duulewá shkerdakane

¹² Sa' tö ipakeke tö Cristo kötëwá, e' shkenekane. Erë a' welepa tö icheke tö s'duulewá kë shkerta'kane. ¿Wes e' chëmi ie'pa tö?

¹³ S'duulewá kë shkerta'kane, e'ma Cristo kë shkenekane.

¹⁴ Ie' kë shkenúpakane, e'ma é ye' tö ie' tté buaë pakeke. Ñies é a' erblöke ie' mik.

¹⁵ Sa' tö ipakeke tö Skëköl tö ie' shkeo'kane, erë s'duulewá kë shkerta'kane, e'ma ie' kë shkenekane. E' mú dör es, e'ma ttë pakeke sa' tö Skëköl ttö wa e' dör kache.

¹⁶ S'duulewá kë shkerta'kane, e'ma Cristo kë shkenekane.

¹⁷ Ie' kë shkenúpakane, e'ma é a' erblöke ie' mik. Se' tso'ia se' nuì ulà a.

¹⁸ Ñies e' mú dör es, e'ma wëpa erblé' ie' mik blërulune, esepa tso'tke weinuk.

19 Se' tō Cristo paneke, e' kē wà tkōpa aishkuō ta, e'ma se' dōr siarē chōkle s'malepa dikia.

20 ĩErē moki Cristo shkenekane! Ie' dōr se' shkerkane e'pa tsá, e' kueki se' wá ijcher tō ñies se' shkerdakane.

21 E' wà dōr i' es: Wēm ekōl wa s'duōwa e' ali'ka sulitane ki. E' sù wēm skà ekōl wa s'duulewa shkerdakane.

22 Sulitane dē'ka Adán wa, e' kueki sulitane wōmenetsá duōkwa wes ie' es. Erē se' bat-sulewa Cristo mik e'pa kōs shkerdakane wes ie' shkenekane es.

23 Erē e' kōs mir wes ikawōta minuk es. Cristo shkenekane kewe. E' itōki mik idene, etá se' dōr ie' icha, e'pa kōs shkerdakane.

24 Eta ká i' erdawa. E' kēwō ska' ta Cristo e' alōraka ĩyi wōkir, ĩyi wák, ĩyi kēkōl wá diché ta' ese kōs ki. ĩ kōs blu'ie ie' tso' e' merattsaitō Skēkōl dōr S'yé e' ulà a.

25 Erē ĩ'ñe ta' ie' tso'ia ĩyi kōs wēttsuk blu'ie dō mik ibolōkpa kōs menewa ie' klō dikia etá.

26 Ie' bolōk bata, e' dōr s'duōwa, e' ki ie' e' alōraka bataie.

27 E' dōr wes itso' kitule Skēkōl yēkuō ki es, e' tō ichè: “ĩyi ulitane menewa ie' klō dikia.” Erē se' éna iane tō mik iyēne “ĩyi ulitane” etá Skēkōl kē ku' e' shua, ie' wák tō ĩ kōs mērō Cristo klō dikia e' kueki.

28 Erē mik ĩyi ulitane mērōtke Skēkōl tō Cristo dōr ilà e' klō dikia, etá ñies Cristo e' murattsá iyé ulà a as ĩyi ulitane dō ie' dikia.

29 S'duulewa kē shkertakane, e'ma wépa

wösune s'duulewā skéie* çïök e' wëkerakitö? S'duulewā kë shkerta'kane, e'ma çïök ie'pa wösune esepa skéie?

³⁰ S'duulewā kë shkerta'kane, e'ma çïök se' e' mùmi weinuk këkraë ttè e' pakök?

³¹ A yamipa, ká bit tā ye' kī idalō me'rie ttsëskua ye' ttèmiwā yile tō. E' dör mokī wës a' tso' batsulewā Skëkëpa Cristo Jesús mik, e' tō ye' ttsë'wëke buaë e' dör mokī es.

³² Íe Éfeso ye' bolökpa tso' ñippök ye' tā wës iyiwak sulusi es. Kë se' shkerta'kane, e'ma çïök e' dalë'ttsekeyö? E' kë dör ìie bua' ye' a. Mokī tō s'duulewā kë shkerta'kane, e'ma iüsö wës wëlepa tō icheke es. E' dör i' es: “Bulepa s'duöralur, e' kuëkī ìñe se' chkö, se' di'yö buaë kaneë.”

³³ Kë a' e' muktsā e' kītö'uk es. E' dör wës yile tō iyè' es, e' dör i' es. “S'yamipa e' wamblö sulu esepa tō s'ser yësyësë esepa sulu'wëkewā.”

³⁴ A' erbiköne buaë yësyësë. Ì sulu kë wamblaria a' tō. A' wëlepa kë bàtsë Skëköl mik yës. E' chéyö a' a' jaëwōkā.

Se' duulewā shkërdakane çis e' chkà dör?

³⁵ Isalema a' wëlepa tō ichakèmi: “Se' duowā, çwës e' shkërmikane? çIs e' chkà dör?”

³⁶ Ì chaké a' tō wës kë s'kabikeitsö ese ì chakè es! Iyiwö tkësö, e' kë dë'kane, ikuala deka tā iwö dalola nunéwā.

³⁷ Mik se' tō trigo wö tkéwā, etā kë se' wā itkëne kuáie. Se' tō iwö dalola tké.

* **15:29 s'wösune s'duulewā skéie:** E' dör ì uk ie'pa wëlepa wöblar es. Kë iyène Skëköl wā tō iü es.

³⁸ E' ukuök_i ta ikua deka wes Skëköl ime'atbak es. E' sù iyiwö ulitane dörakā iwakmik iwakmik wes imeneat es.

³⁹ S'ditsö ena iyiwak klōka ena dù ena nima e' wák dör kua'k_i kua'k_i ñies ichkà dör kua'k_i kua'k_i.

⁴⁰ Ñies ì meneat ká jai a ena ì meneat ká i' a e' dör kua'k_i kua'k_i. E' kōs dör buaala, erë iwër kua'k_i kua'k_i.

⁴¹ Diwö si'wö bëkwö e' kōs dalöburke kua'k_i kua'k_i. Ñies bëkwö kōs e' wák dalöburke ek ek kua'k_i kua'k_i.

⁴² Mik se' shkenekane, eta se' manenettsatke wes iyiwö tkëne e' manerttsa es. Se' chkà i' narta'wa, erë mik ishkenekane, eta kë inur-pawaia.

⁴³ S'chkà i' dör ësela, erë ishkerdakane olo ta' taië. S'chkà i' kë diché ta', erë ishkerdakane diché ta' taië.

⁴⁴ S'chkà i' dör buaë sēnoie i'ñe ta, erë mik ishkenekane, eta imanenettsa sēnoie buaë aishkuö ta Wiköl Batse'r ta.

⁴⁵ E' dör wes Skëköl yëkkuö tö ichè es, e' tö ichè: “Wëm tsá kiè Adán, e' yöne se'ie ttsë'ka.”† Erë wëm skà de eköl Adán es, e' dör Cristo, e' yöne sene michoë mukwak.

⁴⁶ Erë s'chkà sēnoie aishkuö ta, e' kë mène Skëköl wa se' a kewe. S'chkà i' me'itö se' a kewe. E' itök_i chkà sēnoie aishkuö ta Wiköl Batse'r ta ese merdaë se' a.

⁴⁷ Wëm tsá yöne íyök wa, e' kuëk_i e' dör ká i' wak. Erë wëm skà de Adán es, e' datse ká jai a.

⁴⁸ Wépa dör ká i' wakpa, esepa dör wes wëm tsá yöne íyök wa ñe' es. Erë wépa dör Skëköl tso' ká jai

† 15:45 Génesis 2.7

a e' icha esepa dör wes wēm datse ee es.

49 Se' tö wēm datse ká jai a e' kítseraë wes wēm yöne íyök wa ñe' kítse'sö es.

50 A yamipa, ye' tö a' a ichè tö se' chkà i' duöta'wa nurta'wa e' kë döpawa ì blúie Skëköl tso' e' a.

51-52 Ye' ttö ttsö. Ttè bak blëulewa ese chekeyö a' a i' ta: Kë se' ulitane duöpawa erë mik Skëköl duk blane iwà kkachoie tö kawö i' enewatke eta se' kos maneordattsa bet wes s'wöbla tsimiù es. Mik duk ñe' blane, eta s'duulewa kos shkerdaka, kë duöpawaiä. Nies se' tso'ia ttsë'ka, e' chkà maneordattsa.

53 Se' chkà i' nurta'wa, e' maneordattsa chkà kë nurta'wa ese wa. Se' chkà i' duöta'wa, e' maneordattsa chkà kë duöta'wa, ese wa.

54 Mik se' chkà i' manenettsa kë duöpawaiä, kë nurpawaiä, eta ì tso' kitule Skëköl yëkkuö kî, e' wà de, e' tö ichè: “Duewa kî Skëköl e' aléka.‡

55 A Duewa, ¿wé be' diché taië e'? ¿Wé be' e' alö taië e'? Be' kirëbata tso' se' rrewoie taië, ¿wé e' i' ta?”§

56 Se' ser sulu kueki duèwa tö se' rreweke ena sene sulu diché iëne ttè dalöiëno wa.

57 Erë se' nuì olo'yane se' kî Skëkëpa Jesucristo batamik, e' kueki kë se' suaneia s'duöwa yöki. E' kueki kekraë wëstela chekesö Skëköl a.

58 E' kueki, a yamipa dalër ye' éna, a' e' tköwa darërë kekraë Skëkëpa ttè a, kë a' e' sköksa bánet. A' wa ijcher tö ì kos kanewé a' tö ie' a, e' kë weirpa éme. E' kueki a' kî kaneblö buaë kekraë ie' a.

‡ 15:54 Isaiás 25.8 § 15:55 Oseas 13.14

16

Inuköl shteke s'siarëpa kimoie, e' pakè

¹ Inuköl shteke a' tō s'batse'rpa serke Jerusalén e'pa kimoie, e' pakeke ye' tō a' a' i' ta. Inuköl shtō wes ye' tō iyë' Skëkëpa icha erule erule tso' Galacia, e'pa a' es.

² Domingo bit ta' a' wakpa bik ekkë tō a' inuköl shta'ú tō kos a' ulà a' ide. Eta' kos a' a' imermi, e' blö bānet. A' tō iwé es, eta' mik ye' de a' ska', eta' kë a' kawōta inuköl shtök, a' wa' itso'tke blëule e' kueki.

³ Mik ye' de a' ska', eta' wëpa shushtétke a' tō patkëmi Jerusalén inuköl ñe' muk, e'pa tté choie yëkkuö shtekemiyö e' mi'ke ie'pa wa'. Es ye' tō ie'pa patkeke Jerusalén.

⁴ A' ibikeitsé tō buaë idir tō ye' mi'ñak ie'pa ta, e' ta' ye' mi'mi.

Pablo tō ishkak e' aleritsé

⁵ Ye' kawōta minuk Macedonia, e' ukuöki ta' ye' mi'ke a' ska'.

⁶ Isalema ye' e' tsukeat a' ska' si' et si' böt ulatök ö isalema ye' e' tsümüat dö yuëdiö tka ekkë. Es a' a' ye' kimermi ì kiane ye' kī shkoie ese wa' as ye' mi' buaë wé ye' mi'mirö eë.

⁷ Ye' kë shkak a' pakök shkaule. Ye' mú ser a' ska' ká taië, Skëkëpa kī ikiane e'ma.

⁸ Erë ye' e' tsukeat íe Éfeso dö Pentecostés kéwö tka ekkë.

⁹ Íe buaë ye' a' kawö kune Jesús tté buaë pakoie. Ye' bolökpa tso' taië, erë ñies taië pë' éna Jesús tté buaë tsak. E' kueki kë ye' e' yaktsa i' ta íe.

¹⁰ Timoteo kanëblöke Skëkëpa a' wes ye' es, e' kueki ie' de a' ska', e' ta' ikiöwa' buaë.

11 Kě yi kàne ie' dalöseukwā. E' skéie ie' kimú as ie' dōne bĕrē ye' ska'. Ye' tso', ie' ena s'yamipa urke ie' ta, e'pa panuk.

12 Ye' tō s'yami Apolo e' cheke a' a i' ta. Ye' kkōyē' ie' a taiē tō ie' yúñak s'yamipa mi'ke a' pakök e'pa ta. Ie' kě shkak i' ta, erē wĕkkē alè ta ie' a kawō kurmi, etā ie' mi'mi.

Pablo tō ie'pa bata patté

13 A' senú erkĭ. A' e' tkōwā darērē a' erblōke Jesús mik e' a. A' e' tkōwā wĕbla suē, kě a' suanuk. A' erblō darērē ie' mik.

14 Ì weke a' tō kōs ese ú ñi dalēritsè wa.

15 A' yamipa, a' wā ijcher tō Estéfnas ena iyamipa e'pa dōr Acaya wakpa tsá erblē' Jesús mik e'pa. Ie'pa e' ché buaē s'batse'r malepa kimuk.

16 Ye' tō a' a ikiē taiē tō ie'pa esepa ttō dalōiō er bua' wa. Ñies yi isie tso'ñak kanēblōk Skĕkĕpa kanē a' esepa ttō dalōiō.

17 Ye' ttsē'ne buaē tō Estéfnas ena Fortunato ena Acaico e'pa de ye' ska'. Ie'pa tso' ye' kimuk taiē a' kě ku' e' skéie.

18 Ie'pa tō ye' er pablé wēs a' er pablérakitō es. Buaē idir ie'pa esepa kikōkka.

Pablo e' chéat

19 Skĕkĕpa Jesús icha erule erule kōs tso' Asia, e'pa tō a' shke'wēmi. Áquila ena Prisca ena Skĕkĕpa icha ñi dapa'uke ie'pa u a, e'pa tō shkene patké taiē a' a Skĕkĕpa ttō wa.

20 S'yamipa kōs tso' íe, e'pa tō a' shke'wēmi. A' ñi shke'ú ñi dalēr wa.

21 Ye' dōr Pablo e' tō shkene i' shté ye' wák ulà wa.

²² Yi kě éna Skëképa dalër, e' tā as ese kichatër. ¡A Skëképa, be' shkõne bet!

²³ As Skëképa Jesús er buaë chõ a' a.

²⁴ Ye' éna a' dalër Cristo Jesús batamik. Es e' idir.

Tte Pa'ali Me' Skëköl tö Se' a
New Testament and Shorter Old Testament in Bribri
(CS:bzd:Bribri)

copyright © 2010 Wycliffe Bible Translators, Inc.

Language: Bribri

Translation by: Wycliffe Bible Translators, Inc.

Bribri

bzd

Costa Rica

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Shorter Old Testament

in Bribri

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

70b70297-578d-5d61-9b6f-3119201e28ca